


顏氏家藏尺牘

伍

14  
1475  
78





73  
門 4  
號 1475  
卷 78

昭和十五年  
十二月二日  
購求

顏氏家藏尺牘姓氏考

馮溥字孔博號易齋山東臨朐人遷益都順治四年進士歷官大學士加太子太傅諡文毅有佳山堂集山東通志溥生八歲授左氏春秋暨秦漢以下古文即能貫申根柢稍長窮極經史凡天文圖緯及兵書地志罔不博綜陞吏部侍郎時尙書孫廷銓病目右侍郎石申亦以事注籍凡一切推補溥獨主之一秉至公無所曲庇康熙初年四大臣秉政議各省遣大臣二人巡察督撫溥力爭以爲不可乃止陞左都御史有申嚴職任暨省



刑薄稅諸疏拜大學士時薦魏象樞成性又有發帑備  
荒疏在閣二載開誠布公表裏洞達既不詭隨又不矯  
激商略大政或僉謀可用卽庶僚不遺若義所不可卽  
貴近交口而溥必力爭改正總求有益於國而中無成  
心王士正漁洋詩話馮氏自閩山先生起家進士以詩  
名海岱間四子惟健惟重惟敏惟訥皆有詩名兼工詞  
曲惟訥纂古詩紀風雅廣逸諸書有功藝苑惟重之孫  
文敏公琦也文毅則惟訥之元孫云  
龔鼎孳字孝升號芝麓安徽合肥人明崇禎七年進士

官兵科給事中 國朝歷官禮部尙書謚端毅有定山  
集名家詩鈔小傳芝麓官蘄水令以殊尤徵爲御史坐  
言事下獄甫論釋而明社屋入 本朝用大臣薦以原  
官起用屢起屢仆卒以才名受 世祖之知嘗謂左右  
龔某下筆千言如兔起鶻落真當今才子也湖廣通志  
鼎孳令蘄水值流寇猖獗籌畫方略調度兵餉修城池  
登陴防禦不少休王士正感舊集補傳生時庭產紫芝  
因自號芝麓

曹溶字潔躬號秋岳自號金陀老圃浙江秀水人明崇



顧十年進士官御史 國朝歷官戶部侍郎終山西陽  
和道康熙十八年舉博學鴻詞以憂不赴有續徵錄劉  
豫事蹟崇禎五十年宰相傳學海類編金石表靜惕堂  
詩文集沈季友構李詩繫溶天性耿直爲御史劾輔臣  
謝陞削籍熊開元密參周延儒杖溶疏白其寃甲申  
爲流賊所執拷掠三晝夜委厯中得不死後任副憲時  
遇熱審多平反居塞上五年歲饑力請拯救生平肆力  
於文章諸體雄駿而尺牘尤多長牋小副人爭寶之其  
詩源本少陵蒼老之氣一洗嫵調與合肥龔鼎孳齊名

世稱龔曹晚年自號鉏菜翁築室范蠡湖顏曰倦圃時  
花種竹置酒唱和無虛日愛才若渴四方之士倚爲雅  
宗者四十年

葉方藹字子吉號訥庵江蘇崑山人順治十六年進士  
第三人及第歷官禮部侍郎 特加禮部尙書諡文敏  
有讀書齋偶存稿 四庫全書總目方藹初著有觚齋  
集後自棄其稿此集皆入仕以至歸田之作其詩導源  
蘇陸不及王士正秀骨天成而和雅春容颯颯乎治世  
之音也蘇州府志方藹升講讀學士屢被顧問 賜宴



瀛臺撰入箴以進 聖祖善之撰太極圖說 賜貂裘  
文綺

高辛允一名辛傳陝西韓城人明崇禎十六年進士官  
大理評事 國朝歷官工部侍郎陝西通志辛傳提調  
順天鄉試會中使送雨生入闈辛傳斥之 世祖廉得  
其事 召對乾清宮嘉其風節屢加超擢韓故小邑土  
狹民稠資食於延綏各路亂後盜賊出沒辛傳疏請設  
兵神道嶺防守有資邑距潼關三百里輓運維難再疏  
請免

劉思敬字純之江蘇上元人順治四年進士歷官參議  
有徹賸八編江南通志思敬十歲能文任刑部郎中執  
法無所避分校禮闈得士最盛尋擢參議乞終養修江  
南省志

劉體仁字公猷河南潁川衛人順治十二年進士歷官  
吏部考功司郎中有蒲菴集七頌堂集識小錄 河南  
通志體仁生而英異目重瞳五歲父於膝上授大學中  
庸及就傳經史一覽成誦居郎署三年輦下諸名士爭  
欲識之體仁尤好獎借寒畯藏書二萬餘卷告歸後日



手一編不問戶外事詩筆一出人士競傳誦之居家孝  
友睦嫻恂恂可接王士正池北偶談公猷慷慨任俠意  
氣自許嘗遊睢陽睢陽守贈遺頗厚歸經人家墓田徘徊  
久之曰此地自佳惜葬不合法不急遷且有奇禍因  
迂道訪其家爲主人道之曰公誠長者顧力不能遷奈  
何劉曰是易耳盡解橐中裝與之而去此與漢書原涉  
事頗相類又云公猷在鳳陽與其友蘇懋游銘孝廉往  
龍興寺與某禪師扣擊竟日晚歸遂化去是夜蘇夢公  
猷來微笑頌詩曰六十年來一夢醒飄然四大御風輕

與君昨日龍興寺猶是拖泥帶水行 馮仙湜圖繪寶  
鑑續纂公猷性嗜六法蕭疎曠遠思筆高妙乘興寓意  
亦自天然

沈荃字貞蕤號繹堂又號位菴又號充齋江蘇青浦籍  
華亭人順治九年進士第三人及第官詹事加禮部侍  
郎諡文恪有充齋集南帆詠江南通志荃父紹曾有至  
行聚徒授業荃爲河南大梁道有政績游歷詹事學行  
醇潔名重館閣書法尤推獨步爲 聖祖所賞士以一  
長來謁者輒爲嘯植子宗敬兼工書畫仕至四譯館卿



松江府志荃爲大梁道副使殲盜首董天祿牛充大等  
餘黨解散以他事望誤部降同知 召見復四品仍入  
翰林充齋者爲大梁道時孫夏峯爲講充實之爲美數  
句有省遂以目號在詹事新例當流者徙烏喇極北荃  
謂烏喇距蒙古三四千里地不毛極寒人畜輒凍死罪  
不至死不應驅之死地 召令畫一堅持前議 聖祖  
改容納之又言山海關海洲差員宜撤湖口關宜仍徙  
九江有司盜案處分過嚴反滋諱盜不果行  
繆彤字歌起號念齋江蘇吳縣人康熙六年進士第一

人及第歷官侍講江南通志彤以艱歸淡於宦情遂專  
以課後學爲事巡撫湯斌內 召奏吳中縉紳以道義  
自持者彤爲首先是彤爲庚戌同考官所拔如許自俊  
郭琇輩皆知名於世  
徐乾學字原一號健菴江蘇崑山人康熙九年進士第  
三人及第歷官刑部尙書有讀禮通考資治通鑑後編  
澹園集 四庫全書總目乾學家富圖籍所著皆閎通  
淹貫確有可傳集中考辨議說之類亦多與傳注相發  
明蓋乾學爲顧炎武之甥而閻若璩等亦多客其家師



友淵源具有所自故學問頗有根據蘇州府志乾學八  
歲能文爲顧錫疇所知十三通五經主試順天苦心披  
閱拔韓莢於遺卷中明年莢遂大魁天下文體爲之一  
變轉禮部侍郎一切禮制酌古準今多所釐正轉刑部  
尙書甫就職會湖南巡撫張汧以罪被逮証乾學通賄  
事白上疏乞歸上不聽令解部務仍領各館總裁明  
年復爲副都御史許三禮所劾再疏乞歸命攜一統  
志朱元通鑑卽家編緝乾學慷慨有大志生平敦兄弟  
之好急朋友之難尤勤於獎進人物海內之士輻湊其

門名旣高而又與有力者不相下故卒爲所逐

郝惟訥字敏公直隸霸州人順治四年進士歷官吏部  
尙書諡恭定祀鄉賢有恭定集畿輔通志惟訥性謹慎  
操持廉潔初登進士與父傑同朝士大夫多爲欣羨而  
惟訥恂恂守儒素風累官吏部尙書杜絕請託奸胥不  
敢有所上下銓政以清王士正居易錄霸州郝氏自戶  
侍公傑以學吃虧三字揭堂額其子恭定公世守之恭  
定弟惟謙丙戌舉人監察御史惟諤江西布政司參議  
惟謙子士鈞戊辰進士翰林院庶吉士弟士鐸舉人戶



侍公弟位舉人子惟訓壬辰進士廬州府推官惟謨癸丑進士內閣中書舍人都人以爲盛德之報聞 駕至霸州幸其第親見之云

吳元萊江蘇興化人明國姓子貢生歷官禮部侍郎

孫承澤字北海號退谷山東益都人順天上林苑監籍明崇禎四年進士官兵科給事中李自成僭位受僞職爲四川防禦使 國朝歷官吏部侍郎有尙書集解九州山水考詩經朱傳翼春秋程傳補五經翼畿輔人物志益智錄元朝典故編年考天府廣記河紀學典春明

夢餘錄己亥存稿庚子銷夏記閒志軒帖考 四庫全書總目承澤初附東林繼降闖賊終乃入於 國朝自知爲當代所輕故末年講學惟假借朱子以爲重畿輔通志承澤築退谷於西山耄而好學疊疊不倦於吏事多所論述而有明一代典故尤瞭如指掌至於博古精鑒一時圖書之富比之宋田氏云承澤退谷小志京西之山爲太行第八陁自西南蜿蜒而來近列爲香山諸峯乃層層東北轉至水源頭一澗甚深退谷在焉復有高嶺障之而卧佛寺及黑門諸刹環蔽其間岡阜迴會



竹樹深蔚幽人之宮也

法若真字漢儒號黃石山東膠州人順治二年以五經特賜中式授中書舍人次年成進士改國史院編修歷官安徽布政使康熙十八年薦試舉博學鴻詞有黃山詩留四庫全書總目若真詩古文詞少宗李賀晚乃歸心少陵不屑櫛比字句依倚門戶意所欲爲不古不今自成一格張謙宜法徵君傳徵君父孝廉翁中年無子李夫人有身夢法真而生故名若真與弟若貞同登進士盧見曾山左詩鈔黃石先生以高第人翰林再

遷秘書院侍讀與洪安南承疇陳溧陳名夏兩相國不協外調浙江觀察轉補福建禦鄭寇有功遷浙臬平反王式誣告等案浙人詫爲神明轉安藩丁內艱歸以詩畫自娛卒年八十四張庚畫徵錄若真善山水筆有奇趣

李之芳字鄴園山東惠民人順治四年進士歷官大學士諡文襄山東通志之芳授金華推官燭奸理枉讞決如神在臺十有四年忠謀讜議皆關大計彈劾不避權要總督浙江軍務耿逆煽動以衢州係全浙上游且爲



江淮屏障即日移駐有異議者弗聽及耿逆重兵壓境以甘言來誘立斬使焚書誓師出戰賊勢大挫方戰時親冒矢石或勸其持重勿蹈不測答曰我若貪生誰不惜死以此人皆奮力効用卒之大軍入閩長驅三關賊指日面縛而全浙無恙皆之芳親捍三衢力也身在行間歷九年乃凱旋去浙之日士民號呼如失父母浙江通志之芳任金華推官浙省向苦解茶蠟請兌折色又輯賦役全書縷晰條分瞭如指掌迄今奉爲準則以巡鹽御史莅浙洞悉鹽政利弊凡不便於民者悉除之出

督浙閩閩逆告變之芳檄諸路分守要害遣副將黃廷梅力堵仙霞關自趨衢州賊衆數萬攻衢之芳進擊於杭西礮聲震地流矢如雨左右請少避之芳曰今日以兵勝敗爲吾死生可稍怯耶諸將鼓勇直入賊遂却賊黨猶熾以計招降僞將生擒賊首建言進取之路不在溫處而在三衢此賊一破則諸賊駭亂迸散江山常山間有間道可襲我軍進擊使賊首尾受敵河西安能獨完進克大溪灘復江山縣急據關口賊將逆降大兵遂入閩賊平之後疏請豁金衢五郡以前額賦貧民陷賊



來歸者悉爲區畫衣廩又設糜通衢賑往來飢民百二十萬有奇流移者盡復故土

余國柱字石臣號佺廬湖北大冶人順治九年進士歷官大學士

杜恆燦字杜若號蒼舒陝西三原人順治五年副貢生注銓通判未仕卒有春樹草堂集 四庫全書總目恆燦卒寧都魏禧表其墓關中李因篤爲作傳皆悼惜其才春樹草堂集凡詩二卷文四卷塗乙縱橫猶當時原稿中多代人之作蓋恆燦爲郎廷極賈漢復梁化鳳諸

人客畢生出入幕府中所作富贍有餘而多不修飾殆亦由於取辦倉猝也陝西通志恆燦八歲能文值寇亂家中落嘗走四方負米養親鄉試中副車遂入大學念老親家居食貧因策蹇南游時得巨公詩文及珍玩錦綺歸壽其親親大悅恆燦居京師與中翰吳煒交相得同訂觀文大社以振興古文爲志及煒使關中過焦穫復廣其社於邑中學古書院煒去恆燦主盟學者多宗之長安梁化鳳鎮崇明遣迎恆燦旣至化鳳以堤成出獵恆燦陪副乘卽事作平洋沙十章化鳳立命譜入鏡



歌持千金起爲壽歡溢軍中尋遊楚滇復入吳久之歸  
性好客所居濱白渠南冠蓋車騎輻輳每酒酣耳熱潑  
墨揮毫無不厭所欲而去一夕盡焚所著書弟煇急起  
收之得詩文如千篇今所傳春樹草堂集也  
孫枝蔚字豹人陝西三原人明諸生康熙十八年召  
試博學鴻詞特授中書舍人有漑堂前後續集四庫  
全書總目枝蔚於甲申闖賊亂時曾結里中少年殺賊  
失足墮坎中幸不死後至廣陵學賈三置千金旣而儻  
舍董相祠扃戶讀書在當時名甚重然詩本秦聲多激

壯之詞大抵如昔人評蘇軾詞銅將軍鐵棹板唱大江  
東去也陝西通志枝蔚性豪宕敦氣節博學工詩南遊  
吳下流寓邗關以詩酒自娛徧交吳越諸名宿筆床硯  
匣倡和無虛日爲詩沈雄奇古興至卽書不事雕飾而  
意致灑如其自命在韓杜蘇陸之間餘子不屑也名家  
詩鈔小傳豹人身長八尺龐眉廣額衣冠甚偉與尤晦  
菴初未識面一日晦菴集某公處豹人甫入門望見趨  
赴曰此孫先生耶吾固識之相與大笑流寓邗水築室  
數楹題曰漑園烹魚釜鬻隱然寓西歸之志嘗遊焦山



遇大風鼉作鯨吞獨從容扣船歌曰風起中流浪打舷  
秦人失色海雲邊也知賦命原窮薄尙欲西歸太華眠  
時人服其雅量居易錄豹人僑居揚州高不見之節予  
訪之先之以詩云焦穫奇人孫豹人新詩雅健出風塵  
王宏不見陶潛跡端木寧知原憲貧遂爲莫逆交乙巳  
余入都豹人詩云欲問忘情老何名共命禽

應撫謙字嗣寅又字潛齋浙江錢塘人諸生康熙十八  
年薦舉博學鴻詞辭不赴有潛齋文集 四庫全書總  
目古樂書上卷論律呂本原大旨本蔡氏新書而參以

朱子及注疏之說下卷論樂器制度則本陳祥道禮書  
及李之藻泮宮禮樂疏者爲多雖未精博尙爲簡核浙  
江通志撫謙殫心理學窮極底蘊家甚貧環堵蕭然而  
弟子日益進立教惟以躬行實踐爲主以不自欺爲持  
身涉世之本於六經多所發明尤精於易嘗病世儒言  
易失之穿鑿歿後河陽巡撫趙士璧刻其性理儀封張  
伯行刻其潛齋文集行於世李集鶴徵錄先生之生有  
文在其手曰八卦左重耳右重瞳夕偕同志爲獨社取  
有所不爲也有欲試其所守藏妓館舍夜醉先生而歸



之先生雒誦達旦卒不動同里姜御史圖南致饋不受  
一日遇途中方盛暑衣木棉衣投以越葛二端竟還之  
弟子甚多因以樓上樓下爲差如馬融例池北偶談徵  
士性至孝母病數年侍疾晝夜不懈母強爲娶婦終不  
入私室母卒逾祥禫始行合禭禮坐卧不下樓人字接  
梯者有周易應氏集解易學圖說書經蔡注拾遺詩傳  
翼禮學彙編春秋集解古樂書古今孝經辯論編註古  
本大學中庸本義語孟朱註大全拾遺較定文公家禮  
自傳無悶先生傳畧云學不適時不好禫不喜王陸家

言爲文章不詭合自怡悅而已密友多窮交終年不見  
與日見無異足跡不出百里而泰華溟渤皆於書冊見  
之生不逢古人而羲農堯舜若接響聲也著書千萬言  
人來觀者亦不吝云云

應禮璧度璧俱攜謙子杭州府志禮璧禮琮從遊於陸  
隴其克承其所學

吳懋謙字六益號苧菴江蘇華亭人有華萃豫章虔州  
苧菴諸集 四庫全書總目懋謙早從陳子龍李雯諸  
人遊故力追七子之派稱詩多以漢魏盛唐爲宗然時



有蹶張之失江南通志懋謙詩文與同里吳麒齊名有雲間二吳之目生平多貴游所至名公鉅卿皆與結詩社人以明七子中謝榛比之朱彝尊靜志居詩話六益雋上之才託跡林臯荒茅層篠泥水自蔽雅多慷慨振刷穠纖譎詭之習濟於和平之音與天寶大厯鴻烈兢爽姜兆狝松江詩鈔懋謙名醫中秀子中秀家淨土橋與董宗伯陳眉公遊乙酉被難懋謙負尸趨北郭洗血葬之廬墓三載康熙間海內底定壇坫事興乃挾冊放遊自荆豫齊晉嶺南薊北晚歸老郡城築別墅東門外

與白燕菴鄰比稱獨樹園年七十三卒門人私諡曰貞碩

吳農祥字慶百一字星叟浙江仁和人明中允太沖子諸生康熙十八年薦舉博學鴻詞有輿圖隸史彙考嘯臺讀史綠窻讀史錢邑志林梧園雜志唐詩辨疑詞苑古文詞就正稿宣齋南歸雲鴻流鑑嘯臺等集詩餘浙江通志農祥少異敏一覽成誦家有賜書鍵戶伏讀茹經涵史馳騁百家詩不下萬餘首爲文淹貫五經尤精於易與蕭山毛奇齡友善然質疑問難不肯苟同方婺



如吳徵君傅徵君十許歲製芙蓉露下落賦其落句云  
一輩少年爭跋扈明公從此願躬耕既長構樓於別業  
之梧園與弟農復登樓而去其梯戒不聞世上語盡發  
藏書讀之徵君之至京師也大學士馮公溥客之代舍  
時稱佳山堂六子六子者陳維崧毛奇齡吳任臣王嗣  
槐徐林鴻及徵君也徵君鳶肩揭鼻鶴頸指爪長三寸  
鬚鬢鬚頽然淵放得錢輒付酒家而識微見遠吳下人  
沿復社故態角爲尊奢而浙西讀書秋聲登樓孚社及  
慎交諸社爭立名字應之各欲引徵君徵君曰是載禍

見餉也諸君子忘東京鉤黨事乎不答書亦不發視其  
後 天子果切齒諸爲社事者盡搜所刊錄摧燒之著  
爲令常一應李文襄公之芳聘爲草露布且飲且口占  
授書吏一座盡傾久之辭去爲畫便宜數事文襄再拜  
曰戢君良箴吾曩日知君不盡乃以爲文士也袁枚隨  
園詩話先生乳哺時啞啞私語皆建文遜國之事年過  
十歲始不復言

席居中字允口遼東錦州人有昭代詩存卧石山房稿  
林 璐字鹿菴浙江錢塘人有歲寒堂存稿 四庫全



書總目璐安溪懷古序信建文出亡爲真殊爲未考所  
記顏允紹郭少尹等事皆足補史之闕特敘述稍冗耳  
蔣炯河間嚴太守家傳跋 國初西冷諸子古文以鹿  
菴先生爲最所著歲寒堂存稿或譏刻畫太過時近小  
說家然其縱橫奇肆寫一人一事精神奕奕突出紙上  
純得子長之神自勺庭青門外未見耦也

杜 澹字于皇晚號茶村老人初名詔先湖廣黃岡人  
明國子助教祝進子副貢生甲申後流寓金陵有變雅  
堂集江南通志澹僑居白下以詩名自景陵鍾氏譚氏

矯王李規摹漢魏之習流而入於淺薄獨澹不染楚風  
時有莆田余懷字澹心子賓碩鴻客居金陵皆以詞翰  
知名名家詩鈔小傳茶村以明經貢入太學與余澹心  
白仲調齊名南雍角藝兩司成品題甲乙無出三人右  
者一時有魚肚白之目乃金陵市語染房中名色也居  
易錄于皇客揚州人日大雪無事巾車造之論詩竟日  
樵蘇不爨茶話而已乙巳七夕予赴京師于皇詩云記  
逢人日雪造我唵窮愁

吳綺字園次江蘇江都人選貢生薦授秘書院中書舍



人歷官湖州府知府有林蕙堂集亭臯集記紅集宋金  
元詩永嶺南風物記 四庫全書總目 國初以四六  
名者推綺及陳維崧二人均原出徐庾維崧泛濫於初  
唐四傑以雄博見長綺則出入於樊南諸集以秀逸擅  
勝章藻功與友人論四六書吳園次班香宋艷接僅短  
兵陳其年陸海潘江末猶強弩其論頗公然異曲同工  
未易定其甲乙輒以花木爲潤筆因名其圃曰種字林  
與名士爲春江花月社名家詩鈔小傳綺奉 詔譜楊  
椒山樂府大加稱賞遷武選司員外蓋卽以椒山原官

官之寵異至矣已由工部郎出知湖州府多惠政不畏  
疆禦湖州人德之號爲三風太守謂多風力尙風節饒  
風雅也所作填詞小令兒童婦女皆能習之有昆陵女  
子曰誦其把酒問東風種出雙紅豆以爲秦七黃九復  
出故又號紅豆詞人云王暉今世說園次官湖州守爲  
治簡靜放衙散帙蕭然雒誦繩床斐几燈火青熒吏人  
從屏戶窺之不辨其爲二千石也喜與賓客遊四方名  
士過從無虛日卒以此罷官陳維崧三芝集序園次之  
守湖州也擒治豪猾不受請託要人不喜也因其招接



名流遊讌日多以是中之既罷官僦居吳門刻其詩又  
詮次其三子之詩曰三芝集  
姜楨字鐵夫又字桐柏浙江會稽人有曹山草堂飯犢  
居等集陶元藻鳧亭詩話青山吟謝眺紅燭寫莊騷予  
鄉姜鐵夫句漁洋極賞之然猶著色不如其美人五湖  
去夕陽鳥飛還之句淡而彌旨阮元兩浙輶軒錄飯犢  
居樂府五古直溯上游五七律雄渾中時見流麗落照  
云片帆投浦疾獨鳥背城飛曹山云樵徑漸移殘照外  
人家多在石溪邊耐人吟誦

盧元昌字文子自號半林居士江蘇華亭人諸生有杜  
詩闡唐宋八家文選思美廬半林稿鼓離稿江南通志  
元昌著述有盛名詩學杜陵操選政數十年以壽終姜  
兆狃漱芳齋詩話半林初在彭燕又社中與王伊人顧  
見山等俱爲詩中翹楚嘗自言少時夢至一所高絕雲  
表有榜曰離塵樓因吟曰草花喧晝夢螢火暗秋燈醒  
而恐瀟落之識至後果然

純映鍾字伯紫一字蘗子號戇叟自稱鍾山野老江蘇  
上元人明諸生有真冷堂詩名家詩鈔小傳伯紫少與



廬江龔宗伯友善宗伯既貴招至京華下榻焉歲且十稔此外未嘗輕謁一人輕投一刺如天半朱霞可望而不可卽池北偶談金陵紀青字竺遠能詩少爲諸生棄去入天台國清寺爲僧久之復舍去其子映鍾女映淮徐鉉續本事詩伯紫與方文林古度齊名白髮當歌紅牙聽曲說天台舊事娓娓不倦

丁 澎字飛濤號藥園浙江仁和人順治十二年進士歷官禮部郎中有扶荔堂詩浙江通志澎罷歸不問戶外事而自娛於文工爲詩頓挫清壯有沈鬱之思康熙

癸亥葺浙江通志實董其事云林璐丁藥園外傳藥園工詩賦及古文詞自少年未達時卽名播江左其後仲弟景鴻季弟澹皆以詩名世目之曰三丁兩浙輶軒錄云 冊立西宮念無媼典禮者調入東省兼主客貢使至驛廉知丁持紫貂銀鼠美玉象犀從吏人易其詩歸國少有白鳳樓詩吳下女士爭相採撫以畫衫袖後以事牽累謫塞上者五載卜居東岡躬自飯牛暇卽乘牛車手周易吟誦自若所作諸詩語多忠愛無怨怫之意則其所養又可知矣感舊集補傳吳錦雲百朋與柴虎



臣紹炳陳際叔廷會張宇台洽張祖望綱孫沈去矜謙  
毛稚黃先舒丁飛濤澎虞景明黃昊陸麗京圻諸人齊  
名當時稱之爲西冷十子云

張彥之一名慤字洮侯又字峭巖江蘇華亭人明詩綜  
洮侯爲人寬博無同異其詩莽蒼不事繩尺質本景純  
而臻於嗣宗松江詩鈔洮侯幼與弟漢度几荀有三張  
之目初王屋讀書山在細林與陳徵君白石山莊相望  
後洮侯盡斥其田宅卽細林別業亦讓其弟漢度而隱  
於窮巷茅舍取遺書讀之托於酒狂以自廢

范鄩鼎字彪西山洪洞人康熙六年進士十八年薦  
舉博學鴻詞辭不赴有理學備考五經堂文集語錄續  
垂棘篇 四庫全書總目各體雜文本名草草草文格  
酷摹尙書雖本之夏侯元昆弟誥然未免太近游戲語  
錄乃其子翻搜輯諸刻書中鄩鼎評識之語又鄩鼎父  
芸茂嘗選輯山西之文二十卷題曰晉國垂棘鄩鼎復  
取其鄉近人之文依例彙輯謂之續垂棘篇前後四集  
居易錄彪西養親不仕隱居師曠故里講洛閩之學河  
汾間人多從授經以博學鴻詞薦不出人益仰重之



王曰高字鑒茲又字登孺號北山山東茌平人順治十五年進士歷官給事中有槐軒詩文集山東通志曰高幼有神童之譽在諫垣十有七年多所建白癸卯典江南試得兩鼎甲五尙書三大學士可稱得人之盛  
史鶴齡字子脩號菊裳江蘇溧陽人康熙六年進士官編修池北偶談翰林官直講 禁中先在 宏德殿後移於 乾清宮大抵掌院學士一員翰林官一員惟戊午陳廷敬葉方藹日講而 上幸南海子葉偶病以張英代之後葉病愈入直遂三員同直講史鶴齡以編修歸

歿於家特 賜祭奠其恩禮非外庭所敢望

吳正治字當世號賡菴安徽休寧人湖北漢陽籍順治六年進士歷官大學士加太子太傅諡文僖江南通志正治以直講出補江西參政轉陝西按察使所至以清廉執法著內擢工部侍郎轉刑部諸所條議赦令宜急行文量宜停止禁狀外指板嚴婦女私嫁免逃人十家連坐及收旗丁月錢皆著爲令晉禮部尙書武英殿大學士守成法持大體以病致仕

屠粹忠字純甫號芝巖浙江定海人順治十五年進士



歷官兵部尙書有采芝堂詩兩浙輶軒錄粹忠謁選得  
封邱知縣遭河患城垣廬舍傾圯前率令艤舟河干蒞  
事粹忠誅茅立官署置草舍棲流亡修築城垣不兩月  
諸務畢舉以最遷給事中江南巡撫議題州縣外補粹  
忠言爵賞宜從中出余金 熙朝新語粹忠垂髫時讀  
書里中董氏大書戊戌成名四字於壁間後果中順治  
戊戌進士 聖祖以粹忠老年矍鑠 御書脩齡堂扁  
額賜之又賜 御臨趙孟頫行書曰白鹿城頭百萬兵  
碧油幢下一書生如今始識爲儒貴卧聽元戎報五更

李日景字方山山東歷城人有訂醉筆堂三十六卷今  
世說方山客南昌有傳宋荔裳死者特爲詩弔之與宋  
初未識也後至武林聞宋尙無恙喜甚借友人馬疾馳  
相視且出詩讀之兩人相與泣下沾襟已命酒狂飲極  
歡策馬而去

趙崙字閻仙號叔公山東萊陽人順治十五年進士歷  
官太常寺少卿以事謫瀋陽卒戍所有因樹屋集松江  
詩鈔松自奏銷望悞後裁減科舉及童子額類皆有勢  
力者得之公屏絕苞苴禁止竿牘歲科得士類皆孤寒



郡士作爲詩歌以揚休姜某彙爲一冊付之梓人  
鄭 簠字汝器號谷口福建莆田人宋琬贈鄭汝器歌  
註曰莆田宋珏善八分鄭之師也田雯詩山蘊書屋四  
大字一字直可價千緡朱彝尊詩邇來孟津數王鐸流  
傳恨少無人披太原傅山最奇崛魚頑鷹峙勢不羈臨  
清周之恆委曲也得宜勾吳顧苓粵譚漢暨歛程燧名  
相持未若簠也下筆兼經奇緜烟雲飛欲去屹如柱礎  
立不移或如鳥驚墮羽翮或如龍怒撐之而箕張昂萃  
各異狀屏幃大小隨所施

翁叔元字寶林又字靜卿號鐵菴直隸永平籍江蘇常  
熟人康熙十五年進士第三人及第歷官刑部尙書有  
鐵菴文稿梵園詩集韓葵有懷堂文集叔元母夫人娠  
夢神人授以旃檀初名旃字寶林甫離襁褓執父喪如  
成人就傅卽自力於學未第時文章滿海內館試第一  
尋主山東試拔舉世持等皆名選也所居官必舉其職  
才無不可皆以實心達之性和平寬厚而義理所在亦  
屹不可奪在史館每奏一篇 上皆稱善國子生徒例  
有贄公到卽謝絕具疏請復積分之法令諸生習禮肅



觀聽嚴懲不率頗採施行而積分之議竟寢尋定朔望  
釋菜禮六館之士咸彬彬焉銓曹弊藪釐革書然嘗試  
州同知以下請以掣籤爲等差工部歲發柴炭值八萬  
金多侵耗每豫探支時方二十七年所司具稿將給二  
十九年之半公計所虛耗約十萬每歲少給二萬至五  
年其數悉償部例每興一工先計其值上之名曰料估  
工完多冒破所司慮任怨不敢以聞有十年不銷算者  
大工至四十三案公請六部舉司官各二人分董其役  
甫半載積案一清往在工部者視爲畏途如傳舍惟望

速轉調貽禍後人公在部裁一年不滯一案曰莫非王  
事不敢告勞也在刑部聞銀鐙叫號聲輒慘戚嘗語蒞  
州縣奏當之成吾固知多寃然率周内不可破概駁徒  
致株連久繫容更有瘦死者可奈何急於報德不匿怨  
在翰林爲某院長排擊後某董下河之役赴部銷算畏  
公啖以利公却之不肯覈也某御史徧劾京朝官且及  
其子公微言於衆曰仁人所弗忍也御史呼公名辱詈  
之將并劾公無何坐規避事當送刑部公獨不署名曰  
罪止革耳無可加遂免



高層雲字二鮑又字謬苑號菰村江蘇華亭人明檢討承柞孫康熙十五年進士十八年薦舉博學鴻詞歷官太常寺少卿有改蟲齋詩略詞略徐乾學高公神道碑君爲給事時 文皇后上賓 詔集議喪禮諸親王郡王環坐閣臣向前白其議長跪移時武定李公年老起卽跽仆君抗章謂集議國政異時無弗列坐者今議國喪非大臣致敬之地亦非諸王踞受之時閣臣固當自重諸王亦不可倨慢失藩臣守謙之義書奏皆爲頸縮而 天子用君言令後凡見諸王不得引身長跪著爲

令又江淮間議行屯田事民大擾君請急停以甦民困上嘉納之高士奇韻竹軒侍值詩畫橋西望水中亭疑有魚龍出北溟領略瀛洲舊蹤跡十年墨瀋在雲屏自註歲戊辰層雲兄奉 勅畫屏風四幅今尙在澹寧居

御座側

梁清標字玉立號蒼巖又號蕉林直隸正定人明崇禎十六年進士 國朝歷官大學士祀鄉賢有蕉林詩集畿輔通志畿輔告賑清標巡歷保陽諸州縣殫心察覈人沾實惠 上謂侍臣曰梁尙書不愧大臣矩度有武



林斥生誣首逆案叩闈意在婪詐株連甚衆清標訊得其情立置諸法保全無算康熙九年撤南國諸藩清標奉命之廣東移尙可喜家口兵衆洶湧民多竄匿清標鎮靜以安人心得無變會朝命止可喜行清標復命之日上深嘉歡二十一年夏大旱上問諸臣弭災之方清標以省刑對上嘉納之居易錄公精賞鑒蒐羅金石文字書畫鼎彝之屬甲於海內領袖詞林數十年風流宏獎巍然爲鉅人長德家世翔貴甲河朔曾祖夢龍明吏部尙書諡貞敏兄清寬吏部侍郎從兄

清遠吏部侍郎公亦以吏部侍郎拜兵部尙書祖孫兄弟四人入吏部前後相望縉紳榮之嚴沈字子餐號顥亭浙江餘杭人順治十二年進士歷官戶部侍郎有古秋堂燕臺顥亭等集浙江通志沈典試山東故事聖裔無舉者四氏子不得獨雋疏請歲舉二人著爲令擢給事中請解有司被參之任杜督撫委卸之端職官之選不得在籍候憑任倉場侍郎軍興孔棘通羸絀剔侵漁進不軋衆退不廢公歲省金錢二萬餘碧溪詩話顥亭先生爲訥公諱武順之子築室



武林東城以奉母謂之臯園中有清較樓藏書萬卷又有丁公池先賢故址也諸子分居省城康熙中同日被火先生文集遂無孑遺又曰顥亭詩選與丁飛濤合編者久已刊行其北行日紀一冊乃手稿未傳於世查羲選佛詩傳先生能詩善畫嘗爲稽留山作留山堂圖五越月始成

勞之辨字書升號介巖浙江石門人康熙三年進士歷官副都御史有靜觀堂詩兩浙輶軒錄介巖官副都時竭誠獻替知無不言歲戊子江浙米價騰踊疏請嚴海

禁價得漸平又各省截漕照太倉額缺議以半銀半米給兵糧京師億萬戶賴兵餘米以養疏請照舊給發兵民賴之

董 訥字茲重號默菴山東平原人康熙六年進士第三人及第歷官兵部尙書有督漕疏草柳村詩集山東通志訥督學順天士風整肅遷左都御史論議持大體清理庶獄多所平反總督兩江兵民安輯新屯蠹政奏罷之復督漕運設易知小單剔奸釐弊備極其法政務肅清爲人峭直沈雄不以難易回屈及歸田後立族社



設祭田一遵家法平原縣志康熙四十一年 聖祖南  
巡駐蹕柳村之南樓 御書眷念舊勞四字命懸墓上  
又詢其詩集子吏部思凝繕呈留覽其始終顧遇如此  
王士正古夫于亭雜錄默庵以御史大夫改江南江西  
總督有某御史造之甫就坐大哭不已董爲改動舉座  
訝之某出造大治余佯廬相國入門揖起卽大笑余驚  
問之對曰董某去矣拔去眼中釘也

喬 萊字子靜號石林江蘇寶應人康熙六年進士官  
主事十八年 召試博學鴻詞改編修歷官侍讀有喬

氏易侯寶應志使粵南歸詩文等集 四庫全書總目  
易侯前列諸圖不取陳搏之說於卦變亦不取虞翻諸  
家之說而取來知德之反對其解經多推求人事證以  
史文蓋李光楊萬里之支流也江南通志奏濬海口瀉  
積水總河御史上言疏海口則引潮內侵大不便請於  
邵伯高郵間置牐洩水復築長堤抵海口以東所洩之  
水使水勢高於海口則趨潮自迤適萊入直 召問力  
陳不可議遂寢未幾中蜚語罷復 召卒於官  
何 覲山東荷澤人康熙六年進士官內閣中書祀鄉



賢山東通志觀至性純孝年十二以父殉兵難欲解帶  
自縊門客李采賓勸以宗嗣大義且父柩在千里外理  
宜歸葬乃號泣扶櫬奉母歸雖干戈搶攘中卒得保全  
無恙居母喪哀毀骨立情禮兼盡分校順天己卯鄉試  
矢公矢慎加意搜羅所得皆一時名宿

孫光祀字湖玉號柝庭山東平陰人順治十二年進士  
歷官兵部侍郎祀鄉賢有膽餘軒集山東通志光祀好  
讀書尙氣節在諫垣疏凡二十餘所陳皆切要其不下  
部議而逕行者亦有之歸田歲大稔出粟五百石以賑

全活無算至如睦族黨周貧乏設義學建橋梁懿行班  
班又其餘事魏希徵序先生爲孝廉時邁鄉里之難銜  
父兄大讐志氣精誠貫日月而泣鬼神卒申大義於天  
下孫司馬小傳順治丁酉典湖廣試得士一百六人捷  
南宮者六十四稱爲盛事

陸祚蕃榜名印蕃字子振號武園浙江平湖人康熙十  
二年進士歷官貴州貴東道有粵西偶記 四庫全書  
總目偶記多述其督學廣西時道路險阻之苦及爲守  
土有司所不禮事大抵瑣屑細碎不足記錄



周襄緒浙江山陰人貢生官禮部朱彝尊有雪霽同周儀部襄緒對酒康山詩

陸棻字次友號義山原名世枋浙江平湖人以國學生試高等官至宏文院典籍康熙六年進士十八年召試博學鴻詞改編修歷官內閣學士兼禮部侍郎有雅坪集歷朝賦格四庫全書總目棻彙選歷代賦分爲三格曰文賦騷賦駢賦三格中又分五類曰天文地理人事帝治物類每格前各有小引浙江通志棻儼直南書房出五臺金蓮花限韻賦詩立奏試以豐澤園賦

理學真偽論 上親閱卷取第一 熙朝新語棻九歲時值鼎革其父爲馬將軍所獲棻伏草中躍出求代父死將軍愛其文秀以扇示之曰兒能讀扇上詩卽赦汝父棻朗誦曰收兵四解降王縛教子三登上將臺此宋人贈曹武惠王詩也將軍不殺人卽今武惠王矣將軍大喜釋其父乞爲己子棻哭別其父後將軍死得脫歸譚吉璉字舟石號潔園自稱小譚大夫浙江嘉興人明太僕卿昌言孫以監生試第一授宏文院中書舍人薦舉博學鴻詞歷官登州知府有延綏志肅松錄爾雅綱



目歷代武舉考嘉樹堂集鴛鴦湖擢歌浙江通志吉璉  
由內閣中書遷榆林同知會滇蜀用兵上官檄轉餉入  
蜀至寧羗州遇亂撫軍徹餉還棧道路絕吉璉間道從  
黑水峪七晝夜達蟄屋定邊副將朱龍叛直逼波羅堡  
榆林道高光祉問計安出吉璉具畫利害狀光祉是之  
聚士民誓神死守編什伍明號令製幡書障而守吉璉  
間出私財以饗士而自宿城上衆賴以安綏德周繼明  
聚衆數千人入神木與叛將孫崇雅合迎陷延安榆兵  
迎戰不利城中偶語藉藉多欲出降光祉夜呼吉璉曰

事急矣鎮兵疲不足仗奈何吉璉奮髯大呼曰死譚吉  
璉分也出諭士民曰忠臣我與高公爲之豈責若輩死  
然賊一入城子女玉帛皆賊有且若輩今日降明日大  
軍至無噍類矣衆泣拜曰公言是光祉出千金吉璉益  
數百金間道渡河買粟於保德河曲以兵突圍衛之人  
心始堅榆林旣解嚴響水清平鎮羅諸堡猶爲賊保聚  
吉璉單騎諭降之馳至神木檄崇雅繼明曉以禍福崇  
雅繼明亦以衆降陝西通志康熙十四年朱龍叛璉與  
副使高光祉總兵許占魁進剿制府上其功 賜忠蓋



可嘉額以榮之榆林古上郡地明代因寇患始爲重鎮  
良將勁旅星羅碁布而鎮志未立一切方畧制度但錯  
見陝志中限於尺幅不能詳也璉苦心搜訪逐類編輯  
東西千八百里凡一名一物無不訂正是非敘述本末  
志乘之精詳未有如延綏鎮者朱彝尊小譚大夫墓志  
南京不守大夫從父母轉徙道遇寇父被傷力以身蔽  
寇拔刃傷之不動鎗擊其首寇曰孝子也舍之父病歿  
家人三十口留亂軍中斗米三千錢卒全活扶父匱還  
櫛李詩繫吉璉除登州守之任一年以哭子卒璉好撰

述惜其無後

李楷字叔則號岸翁陝西朝邑人明天啓甲子舉人  
國朝官寶應知縣有河濱全書陝西通志楷少聰慧嗜  
古學讀書朝萊山遇異人馬顛仙謂當以文章名世嘗  
築樓高數丈許屏居其上命書估日送圖史手自評隲  
學殖日富居易錄朝邑李瓚以其父岸翁遺墨求跋岸  
翁爲寶應縣高才凌物爲忌者所中罷官關中名士予  
生平交善者如三原孫枝蔚韓詩華陰王宏撰富平李  
因篤邵陽王又旦富平曹玉珂皆一時人豪要以岸翁



爲冠 國初知寶應縣縣改隸淮郡楷力請歸揚得罷  
解草米各項歲省民財萬計政暇則訪古選勝題詠殆  
遍解官後流寓廣陵與江西李明睿著二李珏書久之  
歸里值制府修志延至會城郊迎之長揖上座縱飲揮  
毫當時咸屬目尤工書畫及釋典道藏

李嗣真字愿中號樸庵山東新城人康熙六年進士有  
嶰堂草

呂繇 俟考

譚吉瑄字左羽登州太守吉聰弟康熙乙酉舉人歷官

給事中朱彝尊五經進士譚先生墓表先生諱貞良字  
元孩南京不守浮舟於泃達會稽由臨海抵福州以戊  
子卒於漳州之瑄溪庚寅子吉聰扶櫬歸里甲辰次子  
瑄等始卜兆府城西北二生墟戴璐藤陰雜記竹垞已  
未同徐檢討鈞移寓虎坊橋輯瀛洲道古錄查他山別  
譚都諫瑄詩宣武門東舊宅虎坊橋畔憑欄可惜手栽  
紅杏花開又讓人看

黃垆字子厚號徵庵又號白鶴峪處士山東卽墨人康  
熙二年舉人有夕霏亭詩李象先夕霏亭集徵庵舉於



鄉一時同榜皆談制義短長離合徵庵獨默坐沉思衆  
訊所以答曰此地有水鄉亭北渚亭李北海晁太常讌  
賞地又辛稼軒李滄溟家焉吾方憶兩公踞青雀舫湖  
光蕩漾文思競發爲詩爲詞足可寄託不暇他及也  
黃敬璣字在之號岷雲山東濟寧人曲阜籍順治四年  
進士歷官雲南道御史濟寧州志敬璣授安慶推官廣  
置學田贍士山賊竊發單騎撫降之行取御史州有應  
解臨清德州二倉米往往派之里下民以爲苦敬璣請  
留州支放至今便之典試江南名士袁孟義薛坦賈曾

陸壽名顧鼎新等皆出其門旋以終養歸與黃維祺立  
敬社集譽髦分題校藝其時科名蟬聯皆藉造就之功  
也

東野雲鵬字九萬山東曲阜人世襲廩生魯公伯禽季  
子公子魚之七十三世孫以子沛然官五經博士勅  
封修職郎東野家譜順治七年祖廟摧殘請於邑侯  
重脩之居恆和睦族姓勤儉持家晚年優游自娛五世  
同堂遞見曾元孔尙任出山異數記康熙甲子東巡東  
野沛然掖其父扶杖跪道左手捧奏疏乞爲世官奉先



祀如四氏例 上曰周公姬姓爾姓東野何也沛然奏  
曰昔伯禽季子名魚食采於東野因以爲氏 上問周  
公廟何在沛然指奏曰東望高阜松柏鬱然者卽魯公  
世廟也 上爲引領又顧扶杖者曰此老者何人沛然  
奏曰臣父東野雲鵬年七十有五又問爾族衆幾何奏  
曰丁不滿百 上覽疏訖付侍衛交部卽議  
魏煜如字孟宣山東曲阜人歲貢生歷官金縣知縣曲  
阜縣志煜如由武城訓導累遷金縣令剔奸弊杜侵漁  
斷獄平允人吏畏服

顧炎武一名絳字甯人號亭林江蘇崑山人明諸生薦  
兵部司務再薦職方主事皆不就天下郡國利病書  
日知錄音論詩本音易音唐韻正古音表吳才老韻補  
正左傳杜解補正九經誤字石經考金石文字記文集  
詩集昌平山水記肇域記二十一史年表歷代宅京記  
等書蘇州府志炎武生稟異質自幼篤志古學九經諸  
史皆能背誦見時多故遂屏去山中備求經世之學明  
亡絕意仕進壯游齊魯燕趙西入關中所至交其賢豪  
長者考其山川風俗古今治亂之迹證以金石碑碣自



是聞見益廣凡所論述皆上下古今貫穿精覈當代推  
爲通儒性耿介絕俗少與同邑歸莊齊名有歸奇顧怪  
之目學者稱亭林先生

李因篤字子德又字天生陝西富平籍山西洪洞人明  
諸生康熙十八年 召試博學鴻詞官檢討有受祺堂  
文集詩集廣韻正漢詩評 四庫全書總目顧炎武作  
音學五書特載與因篤一札蓋頗重之闡若璩作潛邱  
劄記則云杜造故事莫過李天生然所謂杜造者今不  
可考則姑存其說矣因篤詩意氣蒼莽才力富贍而亢

厲之氣一往無前失於粗豪者時時有之殆所謂利鈍  
五陳者歟陝西通志因篤年十一爲邑諸生丁明季之  
亂謝去肆力爲古文辭長於詩歌嘗遊長安倣少陵作  
秋興詩八首見者多擊節時往來秦晉間過從悉知名  
士授檢討未滿月卽乞終養疏凡三十七上始允歸抵  
家後寢食湯藥每事躬親越五年母歿遂不復仕性敏  
絕博極羣書又好汲引後學問字者無虛日或有過必  
婉詞規勉未嘗以聲色加人顧炎武嘗集杜句題贈云  
文章來國士忠厚與鄉人蓋實錄也池北偶談天生年



三十棄諸生博學彊記十三經注疏尤極貫穿長律得少陵家法

宋琬字玉叔號荔裳山東萊陽人順治四年進士歷官四川按察使有安雅堂集山東通志琬授戶部主事監督江南蕪湖關潔已恤商歲額轉逾於舊遷吏部在司兩月選人無滯抑之歎出爲隴西道值地震後修築城垣瘞屍賑粥生全者無數隨督隴西學政清慎公明號稱得士歷永平兵備及甯紹台道軍民感戴其德尋陞四川按察使其居家尤敦孝友虛懷下士樂爲薦揚詩

古文辭盛名滿於天下名家詩鈔小傳玉叔少負異才風格道上十八九時卽以詩古文辭屈其曹偶壯歲成進士晉兩浙憲長族不逞子以夙憾飛章告密逮入對簿一門咸就繫羈西曹久之事得白自傷非常奇禍起於骨肉之間躡險騎危僅而獲免遂流寓吳越居無何天子察其冤抑起補蜀臬池北偶談荔裳浙江後詩頗擬放翁五言歌行時闖李杜之奧壬子春予定其詩筆爲三十卷明年宋以臬使入 覲蜀亂妻孥皆寄成都宋鬱鬱歿於京邸此集不知流落何地矣



施閏章字尚白一字岷雲號愚山晚號矩齋安徽宣城人順治六年進士歷官江西道參議康熙十八年召試博學鴻詞改侍講轉侍讀祀名宦有學餘堂文集詩集外集 四庫全書總目閏章嘗謂王士正詩如華嚴樓閣彈指即見而已詩如瓴甃木石從平地築起然其深穩亦在此其文具有歐曾法魏禧爲作集序以爲文勝於詩則過也江南通志閏章博綜羣籍善詩古文詞爲刑部員外讞決明敏督學山左有冰鑑之譽轉湖西道參議湖西故荒瘠多盜閏章撫綏有方袁臨間稱爲

施佛子性仁孝廣置義田以贍宗戚篤窮交厲後學人咸奉爲模楷山左通志閏章任提學僉事以名教自任開講明湖之上其校文研精理法擷華采實各當其可而諄諄提命者惟以孝弟廉恥爲防閑東省士風歸醇反樸者閏章陶淑激勸之力也名家詩鈔小傳向白分守湖西所轄吉臨袁三州兵馬蹂躪之餘邑多逋賦追呼急輒相聚爲盜作勸民急公歌垂泣諭之作彈子嶺竹源坑諸篇以告長吏讀者感泣比諸元道州之春淩行而民亦相勸輸賦毋敢後又數平反冤獄案牘益簡



每高春一視事築愚亭官廨之有暇則與過客觴詠其中無何以裁缺歸臨江故有江清可以鑿句民曰是江如使君清因名使君江至是民送之江上不能別復送至湖會湖漲所乘舟爲御史贈物輕不能渡民爭買石膏填之已渡乏食賣其舟而歸池北偶談愚山少孤事叔譽至孝一日值叔誕辰大集親戚而叔以小故忤意堅卧不起愚山跪榻前移晷辛亥客都門每憶叔輒涕泗事叔如此古人所希有也

朱彝尊字錫鬯號竹垞晚號小長蘆釣客魚師又號金

風亭長浙江秀水人明太傅文恪公國祚曾孫康熙十八年召試博學鴻詞官檢討有經義考曝書亭集日下舊聞明詩綜詞綜鹽菹志四庫全書總目王士正工詩而疎於文汪琬工文而疎於詩閻若璩毛奇齡工於考證而詩文皆次乘獨彝尊事事皆工雖未必凌跨諸人而兼有諸人之勝核其著作實不愧一代之詞宗浙江通志彝尊少聰慧絕人書過眼覆誦不遺一字客遊南北必橐載十三經廿一史以自隨歸里後數年駕巡河上賜御書四字曰研經博物名家詩鈔小傳



竹垞少工舉業下筆千言崇正十年浙東西大飢朱氏  
自文恪公以宰輔歸里無中人產至是絕粒歎曰河北  
盜賊中朝朋黨亂將作矣何以時文爲不如舍之乃肆  
力於三禮左氏內外傳楚詞文選丹元子步天歌人皆  
笑以爲狂年十七作贅壻於嘉興馮氏馮公有客王鹿  
柴者華亭名宿也一見大奇之曰此必以詩名世梅里  
詩輯先生居節廉橋時值歲凶比隣王氏有老僕訝其  
日午無炊烟而書聲琅琅不輟因叩門餽以豆粥先生  
以奉安度先生而忍飢讀書自若盛百二袖堂筆談先

生集里中王翊周篔繆泳沈進李繩良年符爲詩課時  
貧甚餘一布袍繩良兄弟祇一偏提每會則付質庫兩  
家內閩各紡績出之後會復然南踰五嶺北去雲朔東  
泛滄海登之眾凡叢石荒塚金石斷缺之文莫不搜剔  
考證與史傳參互同異其爲文章益奇嘗謂孔門弟子  
申黨薛邦後人不當以疑似妄爲廢斥鄭康成功存箋  
疏不當因程敏政一言遽罷從祀王守仁事功人品炳  
烈千古不得指爲異學皆有關名教之大者 熙朝新  
語彝尊典江南省試拜 命之日卽不見客將渡江誓



於神試畢入京載書滿麓而已盜劫其居得錢二千白金不及一鏹已靡覆不發矣後以吏議當落職特宥之僅左遷焉性嗜酒嘗與高念祖同人都日暮泊舟輒失朱所在迹之已闌入酒肆玉山頹矣

潘耒字次耕號稼堂江蘇吳江人康熙十八年召試博學鴻詞官檢討有類音遂初堂集四庫全書總目耒性好游名山足迹甚廣其詩不事雕飾直抒所見古文蹊徑較平稍遜魏禧諸人而氣體渾厚空所依傍則又耒所獨得也少受業於顧炎武頗得其傳蘇州府

志耒纂脩明史以史事重大上四議總裁然其說令專撰食貨志兼訂定他紀傳後二年甄別議起忌者坐以浮躁降調四十二年上南巡復耒官大學士陳廷敬欲薦起之力辭而止名家詩鈔小傳耒兄檀章字力田負奇才鼎革後銳意欲以史事自任破產購有明一代實錄復彳搜名家文集奏疏數千卷懷紙吮墨矻矻窮年書未成而遭潯溪之難坐極刑死稼堂以孱童遇慘酷幾無生理惟奮志讀書元宗名世己未公卿論薦鴻博以布衣進左遷拂衣歸所編詩以游草名自少游近



游以及海岱台蕩黃廬閩豫楚粵等編外而玉堂之作則曰夢游晚歲林居諸什則曰退游  
毛先舒原名騷以字行又字雅黃亦字馳黃浙江仁和人  
有鍼心慎鈔唐韻四聲表詞韻南曲韻毛馳黃集詩  
辨坻南唐拾遺記 四庫全書總目先舒有聲韻叢說  
又有溟書八卷頗多攷證之文而不能皆有根據其議  
禮尤多臆斷論韻諸書用力較深亦未究其本原如謂  
音當分古今不分南北則是謂古三聲不通用則非又  
有思古堂集四卷自以晚年定本用爲弁冕然所見與

早年等也又有東苑文鈔二卷附會穿鑿詩鈔一卷音  
調瀏亮猶有七子餘風又有小匡文鈔四卷自序曰文  
皆小有所匡又謂求契於天心懷其意久而後落筆今  
觀所錄之文大抵以口舌相辨難不足爲訓又有藥雲  
集一卷皆所作豔體取古織錦詞藥亂雲盤相間深此  
意欲傳傳不得語也晚唱一卷摹李商隱李賀溫庭筠  
韓偓四家以別於初盛之格浙江通志先舒六歲能辨  
四聲八歲能著白榆堂詩與陸圻張綱孫諸人唱和稱  
西冷十子山陰劉宗周講學戡山遂往執贄問性命之



學事父母色養備至遇有疾告廟請代于從父昆弟及族里皆厚遇之嘗輯宋儒語有裨實行者題曰鍼心慎鈔用以自砭兩浙輶軒錄先生少出陳卧子之門廣羅羣籍無不周覽與西河鶴舫齊名時人爲之語曰浙中三毛文中三豪非虛譽也

余懷字無懷號澹心福建閩縣人有曼翁文集秋雪詞研山草堂詩板橋雜記 四庫全書總目明太祖設官伎於南京相沿謂之舊院此外又有珠市亦名倡所居明季士氣儂薄雖兵戈日警而歌舞彌增懷此書追述

見聞上卷爲雅游中卷爲麗品下卷爲軼事文章悽縷足以導欲增悲亦唐人北里志之類

王士祿字子底號西樵山東新城人順治九年進士歷官吏部員外有讀史蒙拾表餘堂十笏草堂辛甲上浮諸集炊聞卮語詞施閨章王君墓碑君典河南解試故事有司繩尺取熟輒穩順不敢涉古人一字謂之中式公獨摘簡一變其卑弱又以不通所司貴人人或惡之撫拾下吏具三木賴叔弟士祐殫力橐餽得不死卽家居會 朝議還主司罣誤者官復起補攷功員外郎而



季氏入爲禮部遷戶部接邸聯騎文采照耀天下目之  
新城二王朱彝尊考功集序子底以考功郎被謫喜溢  
顏面將歸養而母夫人逝躄踴而哭水漿不人口三日  
旣歸血漬於繆幕之上衣不解帶蟣蝨盡生未練而卒  
鄉人謚曰節孝先生

王士禎字叔子一字子側號東亭士祿弟康熙九年進  
士有古鉢集計東廣說鈴子同年王子側居西樵阮亭  
間才堪頡頏予與鄧孝威宗鶴問偕子側遊茗雪子側  
詩援筆立成多見警拔同人每相太息曰濟南二王才

固奇亦以早貴聲譽先布子側才何嘗肯作蜂腰哉  
王士正字貽上號阮亭別號漁洋山人士祿季弟順治  
十三年進士歷官刑部尙書有帶經堂集山東通志士  
正初任揚州司理讞海寇重案全活甚衆以才名內擢  
旋由部曹改翰林屢遷至兵部督補侍郎旋改戶部持  
中會計屏絕膏潤及轉右都御史則抑奔趨崇恬退深  
得風憲大臣之體詩文氣誼冠冕士林六十年海內奉  
爲宗匠所著述甚富家刻共三十二種歿後揚州人奉  
祀於平山堂與歐陽修蘇軾共稱三賢云



宋犖字牧仲號漫堂河南商邱人大學士文康公權子  
以大臣子入宿衛歷官吏部尙書有滄浪小志綿津山  
人詩集楓香詞西陂類藁河南通志犖十四從 章皇  
帝度桑乾水水濶數丈躍馬以過 帝見大喜賜雕翎  
箭五踰年分第諸在衛者犖試第一當改文員父權以  
年少力辭父沒服除選黃州府通判尋權贛關陞刑部  
郎中明於律例通倉有獄在官百五十人負米萬石詞  
連本管犖爭之強卒至衆償負而官亦奪俸時論韙之  
選山東按察使擢江蘇布政察出前司庫空闕銀三十

六萬兩揭報清刷 聖祖奇其才未踰年擢都察院右  
副都御史巡撫江西舟抵江寧聞夏逆之亂時賊連破  
蘄黃二十餘城避兵者蔽江下犖偵知會城遣撫標兩  
校出師託言無餉不發意叵測立檄稅庫銀千兩委道  
員往諭之有言裁軍李美玉袁大相密謀應賊者犖佯  
不省而陰授方畧夜縛二人至立斬之懸其首餘悉不  
問衆乃大定會夏逆亦殄犖條陳病民者十數事黜貪  
吏之甚者宿賊巨猾皆召捕正法江西遂安調撫江蘇  
江南承平久士民愛尙文雅犖遂弛威嚴以清靜無爲



爲治在職十有四年歲豐人和獄盜衰息屢奉 聖祖  
南幸溫語褒獎陞吏部尙書犖少侍父於京邸熟練故  
事無敢亂銓法者歸田後治家整肅建先祠置祭田悉  
倣古名臣遺制山東通志犖甫下車卽開釋疑獄禁絕  
誣枉保全至悞一時吏民皆畏威懷德自稱無冤東省  
命案率多輕生駕害及至昭雪而中人之產已破犖命  
州縣驗實立案必究唆訟之人盡法繩之及歲歉運家  
粟助賑自商及濟布置庄佃接踵移運無輸餽之勞東  
人至今德之畫徵錄牧仲博學嗜古精賞鑒嘗自言暗

中摸索可辨真贋一時以畫名家者悉羅致於家出所  
藏屬櫺副本耳濡目染遂得畫法嘗寫水墨竹小幅疎  
逸絕倫非丹青家所能窺也

王又旦字幼華號黃湄陝西郃陽人順治十六年進士  
歷官戶科給事中有黃湄集朱彝尊給事王君墓誌幼  
華博通六經 賜進士授推官未除改知安陸潛江縣  
以治行徵詣 闕下除給事中聞父喪歸服除補吏科  
轉戶科掌印典廣東鄉試花山接峒人壤士寇結連出  
沒劫商旅君疏建縣治設官吏廣州四縣交賴以安陝



西通志又且授潛江令潛賦役偏重摘發隱漏逃亡返業潛地居襄樊下流漢水厯安陸下大別每夏秋水漲為患又且勸民趣視長堤屹然滇逆告變大軍駐荆襄潛當孔道羽騎絡繹徭役芟芻應時立辦

汪懋麟字季舟號蛟門江蘇江都人康熙六年進士十八年舉博學鴻詞以憂不赴厯官刑部主事有百尺梧桐閣集王士正汪比部傳蛟門幼穎異與兄耀麟同授經長安王巖為中書舍人公事畢輒鉛槧雜誦或行吟殿樅間由是益有名需次部主事崑山徐公以君名薦

入史館充纂修尋補刑部仍直史館南城武某販米於南化園宿董之貴家董利其資殺之武父得屍於道得車馬於劉氏之門謂劉殺其子君微行南門外縱其馬馬至之貴門輒跳躍悲鳴衝戶以入君令收之訊實置於法都人為作馬訟圖王某兄弟與海戶鬥自殺其病弟而訟海戶於官君微行至王某門籠鷺羣鳴延頸如有所訴立逮弟妻訊之具以告某遂自伏初君為中書舍人楚人朱方且挾其術游公卿間君獨作論道篇詆之為妖妄孝感熊公見其文造廬而定交焉



曹禾字頌嘉號峩眉江蘇江陰人康熙三年官中書  
十八年召試博學鴻詞改編修歷官國子監祭酒有  
峩眉集江南通志禾詩古文皆有名有文集行世方象  
瑛松牕筆乘峩眉疏請封禪予在皖城聞倪闇公共謀  
其奏予曰鍾伯敬評封禪頌謂長卿豈真有所求直是  
胷中有一篇好文字不肯埋沒耳闇公笑而然之

葉封字晉叔又字晉原號慕廬本王氏後父嗣於中  
表葉翁始氏葉湖北黃陂人順治十六年進士歷官兵  
馬司指揮候補主事康熙十八年薦舉博學鴻詞有嵩

遊集嵩山志嵩陽石刻集記

四庫全書總目嵩陽石

刻集記葉封官登封知縣時作登封在嵩山南故其所  
錄碑刻以嵩陽爲名此書錄取碑文便於參考王士正  
稱其辨證精博比之劉原父薛尚功王士正葉公墓誌  
銘父長青由黃州衛經歷攝黃陂令殉節死陂人德公  
留占籍焉成進士除延平府推官有巨猾善持官府短  
長吏不敢問君按誅其魁餘皆屏息靖南王駐閩旗下  
肆虐八郡君繩以法不少貸漳河有大姓同室鬥訟終  
不已君決以片言訓以友恭遂相持泣下爲兄弟如初



未幾裁理官改知登封縣嵩山下有虎患君齋戒三日  
移牒於神引咎自責由是患絕選兵馬司指揮歸里往  
來杯湖退谷之間自號退翁及部授工部主事已前歿  
居易錄井叔由登封令人爲兵馬司指揮予取其嵩山  
詩五六十篇爲嵩遊集又選其己未庚申詩合刻之列  
於十子中井叔精爾雅說文學有根抵  
林堯英字蜚伯號澹亭福建莆田人順治十八年進士  
康熙十八年薦舉博學鴻詞歷官刑部郎中河南提學  
道祀名宦有澹亭略福建通志堯英知饒陽縣戶部主

事晉員外轉刑部郎中出督河南學政以古學導士人  
文丕振尋卒於官平生孜孜好學手不停披著有克復  
講章工詩歌燕臺有十子詩畧名重一時堯英與焉河  
南通志堯英任提學道杜絕請託務拔單寒置嵩陽學  
田肄業者賴之

謝重輝字千仞號方山山東德州人大學士清義公子  
廕中書舍人歷官刑部郎中有杏村詩集山左詩錄公  
守清義公家訓居官不名一錢監崇文門稅至於缺額  
清節旣著復以直諒多聞爲漁洋推重



曹貞吉字迪清一字升六號實庵山東安邱人康熙三年進士歷官禮部郎中有珂雪堂總集 四庫全書總目貞吉詩格邁鍊其黃山諸作極爲宋犖所推在京師和其文姬歸漢圖等長歌極有筆力今檢集中不載又王士正感舊集所選登望海樓吳山晚眺金山諸詩亦不見則全稿之散失者多矣又貞吉詩集詞集皆以雪珂爲名而其字寄託遙深風華掩映實遠過其詩蓋才性有偏至也張貞珂雪堂詞譜題辭實庵詩文妙天下問倚其聲作詞遂奪宋人之席吳蘭次名家詞選以爲

歷卷流傳江左推爲絕唱

田雯字子綸一字綸霞號漪亭別號山薑子山東德州人順治十六年進士康熙十八年薦舉博學鴻詞歷官戶部侍郎有山薑詩選古懽堂文集黔書長河志籍考 四庫全書總目王士正負海內重名自趙執信以外無不借其聲譽惟雯與任邱龐塏不相攻擊亦不相攀附塏詩格律謹嚴而才地稍弱雯則天姿超邁記誦賅博欲以雄偉奇麗別闢門庭其名雖不及士正然偏師馳突亦士正之勍敵也山東通志雯任戶部員外時



漁楚用兵軍書旁午請以白糧附漕艘帶運費不煩而  
民力省至今爲例提督江南學政文氣骹靡力崇古學  
所取皆雄駿通偉之士風氣爲之一振出撫江蘇秋雨  
積陰米色多變百姓艱於輸納疏請隨時交兌又以運  
河至京口一帶地勢崇高鑿山成河易於坍塌冬日風  
雪千夫荷鋪泥淖中艱苦萬狀請動司庫大加挑濬一  
勞永逸其他如減湖田之增稅免蘆課之辦銅俱次第  
允行調撫貴州時苗狃獠粵省方議會勦雲移書制  
府謂制苗之法犯則制之否則防之而已若與師動衆

勞民傷財於事無益大征之議遂寢雲於史學最深爲  
文渾涵雄健成一家言周彝田公神道碑公巡撫貴州  
招接土番蠻王世爵土總兵龍天祐誅川蠻阿所率談  
笑指揮採取如囊中物暇則葺學舍購書籍以教黔之  
士子名家詩錄小傳雲在黔自署蒙齋猶之元次山官  
道州呼漫郎客樊上稱聾叟也由進士署秘書院中書  
舍人中書號丞相掾在昔以資供職至是有御史言機  
務重地宜用進士參是選始闢此徑  
程 燧字穆倩自號垢道人安徽新安人後家揚州江



南通志燧爲人高古博學思奇詩文書畫皆工鐫篆尤稱絕藝周亮工讀畫錄楊孟載評黃子久畫如老將用兵不列隊伍而頤指氣使無不如意近人惟道人能之道人詩字圖畫頭頭第一獨於畫深自斂晦惟予能知其妙道人亦自喜爲子作畫徵錄穆倩自號江東布衣山水純用枯筆寫巨然法別具義味品行端慤敦崇氣節從漳浦黃公道周清江楊公廷麟遊名公卿多折節交之喜別古書畫及銅玉之器家藏亦夥

倪會鼎字無功又字子新浙江上虞人明禮部尙書文

貞公元璐之子有因禮會歸集浙江通志會鼎嘗議廣麻溪壩霍洞爲旱潦蓄洩之計又董築西江塘極其堅固山會蕭三邑賴之家貧鍵戶著書有山陰令持兼金百兩以資膏火三至三返之商盤越風子新先生名德碩望推重一鄉其弟恆園先生名會選亦持身高潔工隸書傅玉露撰傳略曰會鼎入侍文貞於京邸偶憇樹下有中貴數人望見卅角儒雅遣使請接席會鼎念方奏撤宦官亟行去時纔十四齡耳黃道周謫官至越從受業周旋患難析性命之學文貞殉國祖母旣大耋母



又屢欲殉死遂杜門奉養頃刻不離康熙十年 詔舉  
山林隱逸有爲推轂者力辭之  
吳 涵字容大號匪庵浙江石門人康熙二十一年進  
士第二人及第歷官左都御史浙江通志涵理寶泉局  
時以鼓鑄故採買廢銅商趨利吏得爲奸設籤聽商  
自掣商人稱便轉刑部審察蒲臺命案粵東提鎮失機  
皆稱 旨進吏侍遇銓選一月前預列應選應補姓名  
次序揭於通衢吏不得上下其手又念舉人揀選或終  
身不得一官疏請單月銓選著爲令

嚴曾渠字方貽又字獲庵號柱峯浙江餘杭人倉場侍  
郎沈子康熙三年進士歷官兵部侍郎有聚德堂集西  
湖先覺堂祠志曾渠歷臺諫二十四年不苟不吐多所  
建白平生汲引人材推獎後進惟恐不及故俸祿所入  
多不給數典朝服會親友桑盆瓦器飲酒賦詩意豁如  
也

董 俞字蒼水號樗亭江南華亭人明吏部侍郎遂初  
孫順治十七年舉人康熙十八年薦舉博學鴻詞有樗  
亭浮湘度嶺等集松江詩錄俞在童時喜讀古人詩略



上口卽能爲聲偶之言與弟含齊名坐事歸卜築南邨  
方塘小榭竹翠花深灌園鋤藥歌嘯自如嘗遊楚過洞  
庭遭風浪有投詩湖泊晚歲自定詩一冊客山東遇盜  
與爭篋爲双臂奪之去惟存楚遊草後其壻曹映會檢  
拾殘賸付梓宋荔裳爲之序說鈴孝廉最善賦學如鏡  
賦燕賦採桑賦皆輕婉流麗可與吳興曹綺頡頏又有  
送客入都詩云蕭條易水遊驅馬向空臺岸柳春前折  
江鴻雪後來極澹雅有自然之致

董 含字間石號榕庵俞弟順治十八年進士有藝葵

詩集三國志畧尊鄉贅筆 四庫全書總目含詩名不

及其兄而詩格高雅過其兄蒼涼幽咽有騷人哀怨之  
遺而愴恍其辭知其意有所寓而莫名其寓意之所在  
焉漱芳齋詩話 國初甲午時詩社復興閩石與其兄  
蒼水掉鞅詞壇聲振吳越其初詩宗盛唐晚年有漸近  
范陸者

張 衡字友石又字羲文號晴峯直隸景州人順治十  
八年進士歷官浙江提學道藤陰雜記晴峯官水曹貧  
不能舉火一日貸錢過慈仁寺見書卽買歸展讀怡然



忘饑今世說晴峯官浙江學使嘗曰節費以奉親省事以卻苟忍氣以養和讀聖賢書近直諒友以無忝所生聞者嘉歎其言喜彈琴後得雷氏古琴脩而銘之紀以長歌一時名士屬和者數百

黃雲字仙裳又字舊樵江蘇泰州人有悠然堂桐引樓諸集今世說仙裳長身玉立能詩文善談論文氣慷慨逢俗人稍不合意輒嫚罵之人多目以爲狂不敢近鄧漢儀字孝感江蘇泰州人康熙十八年召試博學鴻詞特賜中書舍人有詩觀全集過嶺集四庫全書

總目詩觀十四卷皆選輯國初諸人之作別集則閨閣詩也王士正分甘餘話孝感同龔端毅使粵過梅嶺有句云人馬盤空細煙嵐返照濃寫景逼真

趙執信字申符號秋谷晚號飴山老人山東益都人康熙十八年進士歷官贊善有因園集飴山詩集四庫全書總目執信娶王士正甥女而論詩與士正相詆至作談龍錄以攻士正迄今述二家之說者祖分左右實則王以神韻縹緲爲宗趙以思路鑱刻爲主王規模濶於趙而流弊傷於膚靡趙才力銳於王而未派病於纖



灰兩家并存其得失適足相救也名家詩錄小傳秋谷年十八舉鄉試第二次年成進士與館選鴻博之士皆以績學雄文負海內重望虎視蛟騰傲睨一世秋谷以綺紈之年旗鼓相當非肯作三舍避竹垞家陵西河諸君子胥引爲忘年交久之遷宮贊典晉闈試以國恤徵歌縱酒坐削藉年未三十踰大耋始卒藤陰雜記秋谷去官查他山被議人皆知於國忌日同觀新鎮長生殿近於吏科見黃六鴻原奏尙有侍讀朱典侍講李澄中台灣知府翁世庸同宴洪寓而無查不知何以牽及

又傳黃以知縣行取以詩稿土宜送趙趙答刺土宜拜登大稿璧謝因之挾嫌訐奏

黃士塤字伯和號羸山浙江石門人康熙十二年進士官編修

王仕雲字望如江蘇江甯人順治九年進士官泉州府推官有格言僅錄周櫟園先生年譜乙未福建總管佟代疏泰公在閩事赴閩質審事皆莫須有於是泉州司李王仕雲延平司李吳淇滋建甯司李孫開先福州司李田緝馨江甯司李盧圖龍會審上之按察使程之璿



事乃大白時聞大旱牘具雨大傾注民爲作歌曰束卷  
雨  
王宏撰字無異又字文脩號山史陝西華陰人康熙十  
六年薦舉博學鴻詞以病未就試有周易筮述正學隅  
見述砥齋集 四庫全書總目周易筮述以朱子謂易  
本卜筮之書因作此編以明其義凡十五篇雖尚爲樸  
著而作然闢焦京之小術述羲文周孔之宏旨立論悉  
本經義與方技家所說迥別又曰正學隅見述以朱子  
無極之辨陸九淵攻之於前格物之說王守仁軋之於

後諸儒各爭門戶垂數百年宏撰謂無極之說當以陸  
九淵爲是格物之說當以朱子爲是因作此書以持其  
平居易錄山史博物君子也所著十七帖述并著極雋  
而核嘗刻華州郭宗昌金石史家藏漢唐以來金石文  
字甚富古文詞亦嫺雅以博學宏詞徵至京師居城西  
昊天寺不謁貴游以老病辭不入試罷歸在關中蓋張  
芸叟一流人

曾燦原名傅燦字青藜江西寧都州人應遴子有止山  
集江西通志傅燦與兄並工詞章喜然諾方國事多故



思以功業自見折節下士一洗貴介才華之習士論翕  
然歸附乙酉楊廷麟聚兵保吉贛應遴計閩寇閩王總  
有衆十萬俾往撫之會 大清兵已克贛乃解散去燦  
後薙髮爲僧奔走閩浙廣之東西龔太常鼎孳應遴舊  
同榜愛其兄弟甚勸燦出就舉弗應大母陳母温念燦  
成疾乃始歸家謁省以大母命受室築六松草堂躬畊  
不出者數年燦自幼有詩名選海內名家詩二十卷號  
過日集僑居吳下二十餘年著西崦草堂詩後客游燕  
市卒

陳玉璣字賡明號椒峯江蘇武進人康熙六年進士官  
中書十八年薦舉博學鴻詞有學文堂集 四庫全書  
總目玉璣說經之文及辨議諸作亦頗有源委不同勦  
說然大致透迤平衍學宋格而未成王暉今世說稱玉  
璣每讀書至夜分兩眸欲合如綫輒用艾灼臂久之成  
痂蓋亦苦學之士又稱其所爲詩文旬日之間動至盈  
尺見者遙其儁才則貪多務博可知

伊闕字翁菴又字盧源山東新城人順治十二年進士  
歷官雲南巡撫王士正伊公墓誌公以康熙庚申巡撫



雲南歷五谿毒滌之地上霧下潦不遑啓處及抵昆明諸道官兵以萬計所需屣履糧糗芻茭之屬稱是咄嗟而辦及歿於軍中遺橐祇十餘金在臺二載屢有章疏率多削藁喜摹晉人帖合處入能品池北偶談山東解元在明時仕多不達至順治戊子翁菴以乙未改翰林至節鉞甲午大嵩趙庶常浮山以己未丙午鄆城魏侍讀子相以丙辰壬子濱州王檢討甲先以癸丑乙卯德州李編脩紫瀾以丙辰丁巳諸城王編修沛思以己未辛酉德州孫檢討子未以乙丑丁卯陽穀劉受常琰以

辛未凡歷十五科而入翰林者八人

柯鼎 侯攷

翁英考江南通志英會以工部員外郎推淮安鈔關

鄧秉恆字元固號忍菴山東東昌衛人順治六年進士

歷官湖廣道參議有瀧江詩文集江西通志秉恆任永

豐知縣奸蠹遁迹摘發如神山寇盤踞率鄉勇蕩平之

建思江橋民稱便吉郡食廣鹽鼎革後鹽不行而課存

秉恆內召疏免廣課闔郡德之

郭榮字芝仙號快圃直隸清苑人順治九年進士歷官



內閣學士兼禮部侍郎有快圃詩鈔 四庫全書總目  
蔡文頗華瞻惟應酬之作太多未免失於刪汰會修畿  
輔志及保定府志今集內所載星野沿革等說皆志中  
之文蓋用鄂州小集新安志序之例也畿輔通志蔡博  
學工文會著 皇畿大一統賦系數萬言士林傳誦  
侯杲江蘇無錫人順治六年進士曾官刑部郎中  
王如辰號北埜山東膠州人順治十二年進士歷官廣  
西提學道僉事山東通志如辰初授山西交城令治多  
山縣延百里積寇盤踞時時攻劫爲害之任七日設計

擒渠魁歸京師正法邑多虎患爲文檄之虎逸去擢戶  
部歷郎中出督學廣西時值兵燹九府學宮大半鞠爲  
茂草乃倡捐建復於桂林建華掌書院擇諸郡名士讀  
書其中所造士甚衆風氣爲之一開

孫浣思

侯攷

張楷江蘇江都人康熙六年進士官知府

何規中浙江仁和放鶴亭羽士

史逸裘字雲次江蘇金壇人浙江仁和籍順治十二年  
進士歷官山東兗州沂曹道有五經集論廿一史約江



南通志逸表歷兵部職方掌軍政昭雪叛案無辜者幾  
千人督學河南時初復八股之舊益以起衰爲已任陞  
少參分巡東兗歲饑首建停徵之議以艱歸卒  
釋興源字楚雲湖南長沙人有梅檀閣稿居易錄楚雲  
禪師者天界浪杖人之孫竺菴成公法嗣也康熙癸酉  
會訪予於京師庚辰復來過訪云將歸南嶽且云居士  
大名今日歐蘇也吾住江西三年又嘗往閩中博山東  
苑二祖庭掃塔凡深山窮谷漁樵耕牧之徒無不知居  
士名者

王九齡字子武又字薛澱江蘇華亭人御史廣心子康  
熙二十一年進士歷官左都御史有松谿蓴香艾約山  
房秦山草堂諸集 四庫全書總目九齡挹何李之流  
波而才思富豔加以纖穠如金陵雜感云十里青樓原  
上草六朝金粉路旁花殆純以情韻勝矣居易錄乙丑  
會試王戶待鴻緒儼齋爲總裁其母兄編修九齡爲同  
考試官尤爲僅見松江詩鈔都憲於三昆中最晚達旣  
入史館猶手不釋卷故其詩深沈迥鍊是從苦心孤詣  
得來



張鵬字南溟江蘇丹徒人順治十八年進士歷官刑部侍郎池北偶談歷城王萃字秋史少年能詩清拔絕俗余偶以書寄張中丞言萃之才中丞特召見引之客座且贈金焉萃之才中丞之誼皆塵中所少也  
張士甄字繡紫順天通州人順治六年進士歷官吏部尚書畿輔通志士甄官刑部尚書持法平允務寬大改禮部又轉吏部掌銓三載謝請託疏壅滯公愼自矢朝論歸之常奉使祭恆霍諸山途遇山西裁兵憫其無依為設地屯處河東鹽課積逋屢疏請豁免

沈允範字康臣又字肯齋浙江山陰人康熙六年進士歷官刑部郎中有采山堂集紹興府志允範在襁褓有異徵祖父皆器之稍長究心經史以詩文雄視海內名流樂與之交戶外屢常滿也歷官刑曹每有矜疑終夜不寐獄是以不寃越郡詩選康臣樂府以唐調雜古音頗近元辭其詩近體尤工然一夕而嘔血數回雖曰苦思抑亦神忌之矣

孫一致字惟一江蘇鹽城人順治十五年進士第二人及第歷官侍讀學士有世耕堂集江南通志一致父助



以孝友稱鄉里一致少有異才以拔貢赴廷試當赴推官不就恬澹嗜學以母憂歸遂不復出糲食藜羹展卷吟哦詩宗杜甫兼出入王維孟浩然閒

鄧旭字元昭江蘇壽州人順治四年進士歷官甘肅洮岷道副使有林屋詩集吳偉業贈檢討鄧公墓志其未舉子也遍禱於山川夢日而生故名之曰旭字元昭撒木哈滿洲正黃旗人順治十二年進士田種玉字公琢號遜菴順天宛平人順治四年進士歷官文淵閣學士工部尚書兼太子少傅

劉良俟考

陳一炳字虎文曾官吏部侍郎池北偶談本朝用人器使有不拘文武資格者吏部侍郎陳一炳戶部倉場侍郎周卜世前總督浙閩兵部侍郎劉兆麒俱改都督同知僉事等銜充山西山東直隸等處接勦提督總兵官

錢芳標字葆粉江西華亭人刑部侍郎士貴子康熙五年舉人官中書十八年薦舉博學鴻詞以憂不赴有東溟草金門藁詞輓池北偶談松江錢少司寇艱於嗣與



夫人往天童祈子大師爲集衆僧問誰願往皆不答一  
飯頭老矣自言願往旣而錢果得子名鼎瑞字寶汾後  
易名芳標字葆齋辭華麗藻有名東南官中書旣而假  
歸一日方與客坐齋有僧至門持一楫書云自天童來  
舍人啓視之殊不駭訝但云倉卒奈何明日晨起徧召  
賓客與訣索筆書一偈云來自白雲來去自白雲去笑  
指天童山是我舊游處微笑而逝

程汝璞安徽合肥人順治四年進士官浙江提學道魏  
象樞糾參疏畧汝璞聽蠹書祈茂之等創立社師名色

不論優隸賤役卽與批呈仰學入冊准作社生以訪拿  
有過生員爲名行牌各學嚇銀餽入免拿濫准詞狀動  
輒親提指事勒索考案未發預使書役分頭播揚擇殷  
飛噬勒索教官贄見陋規不餽者口罵奴才嚇放下等  
以示凌辱生員遺才科舉每名勒銀二十四兩後減爲  
十二兩山僻地方無人賄買其童生入學故缺額數將  
別縣文武童生撥補嘉善儒童魏燾首名入泮因未餽  
獻行牌除名詐銀四十兩復行銷牌考試私帶姬妾忽  
以七相公乳母爲名忽以闕文相公爲名用轎臺入試館



張貞字起元號杞園山東安邱人康熙十一年拔貢官翰林院孔目十八年薦舉博學鴻詞以憂不赴祀鄉賢有祀田集山東通志貞刻苦好學博覽羣書遨遊四方時與海內名流揚今推古一時稱文章巨手事母孝尤敦內行母以節著貞克承母志以光父業史館缺員以待詔用亦不就退居杞城日以著述爲事李質庵杞園先生墓表先生所著有家乘族譜杞紀鄉賢傳半部稿或語潛州集耳夢錄行世新城王司寇與先生爲莫逆垂老猶求先生定其文亦手定先生文論者至欲於

虞山堯峯間展一席地先生之文可知也

朱宏祚字微蔭山東高唐州人順治五年舉人歷官浙閩總督有清忠堂奏疏山東通志宏祚選授盱眙令以廉勤自飭值歲歉申請蠲賑復自假貸二千餘金煮糜餉之隣封就食者常數萬人訖無流殍以卓異補刑部郎發奸摘伏冤獄多所開釋出守直隸亦著聲績遂撫兩粵抵南雄首革庠嶺役夫先是粵東軍興芻蕘屨屨之需徵至百萬餘金反浮正供宏祚亟爲裁革臨高澄邁吳川諸邑殘於兵變村舍爲墟疏請蠲賦以招之流



亡悉復故業尋改總督浙閩飭營伍覈餉械嚴扣剋東南壁壘一時改觀復奉修南河卒於工所

張永祺字爾成順天大興籍江蘇宜興人順治九年進士第二人及第歷官國子監祭酒

成 性字我存安徽和州人順治六年進士歷官工科給事中池北偶談益都馮公薦起魏光祿象樞於田間并及成主事性於是魏授御史成授給事中成卽魏己丑門生也會以中書舍人假御史巡按福建有清直聲在京師卻埽絕交遊亦廉介之士然其自述有云不用

磁器以木代之亦矯矣在省中無他建白惟請遣官清丈蜀省田增加賦稅會有兵事不行

袁時中字來菴浙江鄞縣人康熙六年進士歷官提學副使

茅 慶字天石浙江歸安人兩浙輶軒錄天石工畫山水人物而於詩亦佳

沈季友字客子又字南疑浙江平湖人康熙二十六年副貢生有學古堂集南疑集迴紅集輯賦格柘上遺詩橋李詩繫 四庫全書總目季友爲陸萊之壻與汪琬



毛奇齡以詩相唱和奇齡爲作詩序以才子目之然柳  
揚皆在是矣又曰詩繫所錄嘉興一郡之詩由漢晉以  
至國朝每人各爲小傳詩中山川古蹟民風物產亦  
多所考證兩浙輶軒錄客子爲西平知縣榮之子少聰  
穎精制藝及古文詞年二十六刊南疑集行世一時紙  
貴名動江左

汪耀麟字叔定江蘇江都人中書舍人懋麟兄有抱未  
堂集

顧宸字修遠江蘇無錫人明崇禎十二年舉人有宋

文選杜律註解江南通志宸有文名蓄書尤富

曹申吉字澹餘號逸菴山東安邱人順治十二年進士  
歷官貴州巡撫殉吳三桂之難有黔行黔寄二集山東  
通志申吉分守湖廣鄖陽治政循卓而尤長聽斷浚厯  
禮兵二部侍郎酌復舊章多所建白出撫黔中改衛所  
歸併州邑以一事權招撫生苗編隸版圖迪以文教不  
三年而吳逆叛舉家被害張貞曹公墓志先生撫黔多  
善政十二年冬吳逆難作被執當聞變之初夜遣僮人  
飛章入奏疾馳六千里十二日而達都門上始得吳



逆反狀庚申夏蠟書赴 關密陳機宜為賊所覺遇害  
於昆明之雙塔寺

董 樵字樵一字鷺谷號東湖山東萊陽人明諸生有  
南遊岱遊賈遊諸草入山偶存燕臺還山耦耕堂諸詩  
靜志居詩話董生高蹈之士甲申後徙居文登海濱日  
荷篠入市易米人莫知其住處縣有紳士要於路欲與  
語生棄薪道左詭云吾科頭當取冠與公揖竟去日暮  
不復來紳士取棄薪以歸曰此高士所遺也生從此不  
復入市王士正董烈婦傳烈婦孫氏棲霞人諸生士彥

女歸樵子道廣樵客即墨而道廣病婦方歸省父母心  
動趨歸道廣病且殆烈婦瞑目絕飲食矢必死三日道  
廣死婦從容告廟與姑劉氏訣顧謂弟仲桂曰歸語父  
母勿過哀女無以答劬勞是所以報耳遂自經海岱間  
人奇婦節而多士彥賢知樵者皆為賦詩云

高 詠字阮懷號遺山安徽宣城人歲貢生候選知縣  
康熙十八年 召試博學鴻詞官檢討有遺山堂詩若  
巖堂集江南通志詠幼有神童之目其學無所不窺書  
畫與詩世稱三絕充明史館纂修所撰史藁皆詳慎不



荀吳陳炎曠礫記詠少時夢於市上見大幅字狼藉盈街不敢踐尋一側路行不覺輕舉人雲中至一所樓閣壯麗踰牆入門有黑髯若元壇神者從一卒擁皂纛自內出詠左避神睇如顧問纛卒有所言者再乃去遂至內闕門門左冕而執笏山立者甚衆知爲天庭方恐懼倉皇則有導以行者至右偏殿額曰三官堂有公座三黃裯畫皐比私念何可據三官堂遂出最後引至文昌宮以第三座命之曰可坐此驚而寤作飛龍引以紀康熙壬子 廷試至五鳳樓金水河彷彿夢中以爲兆

應矣尋以薦授史官數年復夢此境心惡之以疾請假歸里每語人曰當以二十八日辭世究不言其故次年二月卒果二十八日名家詩鈔小傳阮懷年近六旬始以明經貢太學崑山徐相國延至家塾一日舉觴相屬曰先生早歲卽藉甚聲名某甫就傳欲顏色不可得幾作天外真人想今竊不自意屈致門下實慙且幸敬以此爲先生壽阮懷唯唯取酒立飲座客驚歎皆謂高草野倨傲而多相國賢

汪琬字茗文號鈍翁江蘇長洲人順治十二年進士



歷官刑部郎中康熙十八年 召試博學鴻詞改編修  
有堯峯詩文鈔鈍翁先後類稿 四庫全書總目琬與  
魏禧侯方域并以古文擅名宋犖嘗合刻之然方域才  
人之文禧策士之文惟琬根柢經典不失爲儒者之文  
歐蘇曾王固未易擬以接跡王慎中唐順之歸有光等  
無愧色也又曰琬請告以前所作詩文自輯爲類彙六  
十二卷刊板置之堯峯皆山閣其歸田後作輯爲續稿  
又取明史列傳彙附以汪氏族譜及其父行畧爲別集  
有周公贄者爲校刻之後琬復自刪擇取其愜意者爲

堯峯詩文鈔屬林佶繕本刊行蘇州府志琬少孤自奮  
讀書五行俱下觀政通政司假歸銳意爲古文辭以起  
衰自命授刑部郎中河南民張潮兒以母讐殺族兄論  
死琬爲復讎論引律文罪止杖爲據以奏銷案兵馬司  
指揮剛直不撓理寃誣決疑獄懲奸豪任滿去民炷香  
攜酒送者塞道復爲戶部主事假歸結廬堯峯在史館  
六十日杜門稱疾踰年告歸爲文根柢六經浸淫史漢  
取法唐宋元明大家立言命意各有所本嘗自言吾文  
從廬陵入非從廬陵出其敘事尤有法度名家詩鈔小



傳鈍翁性卞急遇意所不可輒攘臂爭卽詩文得失不  
少假然坦率無城府片語之佳不難俯首至地家居弟  
子日進常教之曰學問不可無師承議論不可無根據  
出家不可無本末其指歸如此

路鶴徵字湘舞一字青城初名迺登江蘇華亭諸生松  
江詩鈔湘舞研精古學文采宏麗常同王含章客大梁  
幕共輯二十一史纂注

王暉初名棐字丹麓又字木菴一字松溪浙江仁和人  
有霞舉堂集南窗文畧檀几叢書文津今世說贈言

偶集墻東草堂詞今世說丹麓家旣落顧時喜刻書客  
至質衣命酒其詩曰平生好賓客資用苦不周有懷莫  
可告室人且見尤施愚山誦之輒失笑曰蓋有類予者  
李植山東利津人明崇禎七年進士官御史 國朝  
歷官河南巡按山東通志植授陝西韓城知縣開渠灌  
田捐粟賑饑行取御史 國朝巡按河南值撤差絕意  
仕進卒於家

周在浚字雪客河南祥符人戶部侍郎亮工子流寓江  
寧官太原府經歷有藏密菴秋水軒集潛邱小蘂花之



詞天發神讖碑釋 四庫全書總目天發神讖碑本在江寧城南之巖山後在天禧寺門外至宋胡宗愈移置轉運司後圃元楊益又移府學中一名三段碑吳天璽元年刻石黃伯思以爲皇象書或以爲蘇建其字怪偉兼以碑斷裂頗難辨識在浚合其石貫以巨鐵重爲釋文而以諸家題跋附之

李之粹漢軍鑲黃旗人貢生浙江布政使

龍光字二爲安徽望江人康熙六年進士歷官福建同知古夫于亭雜錄光自記前身太白山湫龍也每雷

電風雨輒心喜意氣飛揚然仕途輾軻仕至福建某府同知

鄭淮字桐源江寧人墨林韻語桐源畫山水筆意展拓氣宇軒爽卽尺幅便面谿徑自別雖淵源樊氏浴沂而去其枯冷之致

宋寶穎字旣庭江蘇長洲人順治八年舉人康熙十八年薦舉博學鴻詞官興化教諭有讀書堂老易軒玉磬山房等集春秋拾遺蘇州府志寶穎淹貫經史詩文典雅爲詞壇名宿侍講繆彤少從授經宅心淳厚喜獎後



進以故人益重之魏禧曰實穎母夫人葉當乙酉兵亂  
與季子實方女雪娥實穎婦朱氏同赴井仲子實粟從  
既經日母及實粟死而實方雪娥與朱氏直立水中竟  
不死池北偶談既庭作黜朱梁紀年圖論其義嚴正略  
云王莽不得爲新安祿山不得爲燕全忠豈得爲梁乎  
且移檄興復唐室者有晉岐蜀淮四國或爲唐之王子  
或爲唐之賜姓今黜朱梁紀年而以晉岐淮南之稱天  
祐者爲主始於天祐四年至後唐莊宗同光元年而止  
亦春秋書公在乾侯之義也

汪徵遠字扶晨號栗亭後更名士鉉安徽歙縣人有滄  
螺集稽古堂稿穀玉堂近詩漁洋詩話扶晨工於詩古  
選尤間澹有王韋之風若黃山詩有不見菴中僧微雨  
潭上來不愧古人

曹重初名爾垓字十經江蘇婁縣人有濯錦詞雙魚  
曲譜松江詩鈔重以父煊乙酉遇害乃絕意進取風雅  
自耽博學工詩善繪事尤長于詞兼好度曲有雙魚譜  
流傳繩索千里生其自號也初家干溪晚年移居郡東  
郊築臨溪書屋居之爐香茗椀古色斑然至今風流猶



可想見金山縣志曹重母吳氏名拙號冰蟾子妻李氏  
女鑑水並能詩善畫合編集曰三秀笛餘小藁張僧繇  
畫花遠視作凸凹狀近看却平曹子十經頗得是意雲  
山酬唱十經年少才華溢發其詩文絢爛如赤城霞或  
堅潔如藍田玉又善丹青與雪田諸子起墨林詩畫社  
耿願魯字又樸又字公望山東館陶人康熙九年進士  
官編修有韋齋集山東通志願魯幼穎慧六歲卽通經  
史善詩工楷書充同考焚香齋天期獲奇士以報國  
王士正耿公墓志耿一白先生明登宏治進士官監察

御史抗疏劾逆閹劉瑾直聲震天下累官江西參政曾  
孫如杞登萬曆進士官遵化監軍副使不拜逆閹魏忠  
賢祠爲閹黨劉詔所劾逮詔獄累官山西巡撫中丞子  
含光官高密訓導生編修公癸丑爲會試同考官首得  
韓公莢餘如徐倬董閭繆綿宣輩皆詞林眉目一時推  
公知人  
黃之鼎字訥菴直隸元城人康熙六年進士  
柳燾字公窿山東臨清州人順治八年舉人居易錄  
蔡維寧吳洞庭山人弱冠能詩爲工部尙書臨清柳公



隆所知會逆閹魏忠賢亂政柳公將發其姦病不能起  
泣屬維寧維寧諾之奮筆草數千言疏成柳已病革其  
家人竊焚之維寧慟哭出都閹兒既誅維寧踴躍之清  
源告柳公墓公隆能詩工書與予辛卯同年相善云  
魏麇徵字蒼石江南溧陽籍高淳人康熙六年進士歷  
官邵武府知府有石屋堂鈔西湖和蘇詩濂洛風雅選  
杜詩評註駁正錢箋濟寧州志麇徵避寇徙濟寧與王  
士正田雯顏光敏友善由中書督軍儲有功充杭邵武  
知府清介明敏所至有聲性嗜書案牘之餘手披口吟

自夜達旦推監司不就謝病歸平生著述甚富在杭有  
和蘇詩數卷毛奇齡謂爲坡公後身墨蹟存十之六七  
濟人士共寶之

惠周惕字元龍號研溪江蘇吳縣人康熙十八年薦舉  
博學鴻詞以憂不赴三十年進士官密雲縣知縣有易  
傳春秋問三禮問詩說研溪時文集 四庫全書總目  
詩說於毛傳朱傳無所偏主惟自以己意考證引經據  
典所得較多蘇州府志周惕世居吳之東渚父有聲明  
貢生與同里徐枋友善以九經教授鄉里周惕少傳家



學又從枋及汪琬游究心經學工詩古文詞既壯遍歷四方與當代名人交

吳元龍字長仁號卧山江蘇華亭人康熙三年進士歷官督捕理事十八年 召試博學鴻詞改侍講有問月堂詩鈔江南通志元龍預修明史奉親以孝聞子廷揆進士官太常少卿才望甚著

李鴻霍字季霖號厚餘山東新城人康熙三年進士歷官沅江府知府有歷游觀海餘則滇南諸集沈廷文李公墓誌公會祖九青自長山遷新城父采蘭績學力行

多隱德公邃學工文精衡鑒分校北闈所取皆名士典試浙江得人尤盛轉戶部郎中出知沅江府教養兼備周 碩字子遜山東鄆城人

鍾 朗字玉行號廣漢浙江建德人順治十六年進士歷官布政司參議浙江通志朗出視江南蘆政蘆故奸猾弊藪強弱輸賦不等積逋至二十餘萬朗偕使者按籍履畝確查得豪富侵占胥吏飛灑等弊陳請豁免貧戶積欠數萬兩

蔡兆豐江西金谿人官温州府知府



張錫懌字越九號宏軒江蘇上海人順治十二年進士  
官泰安知縣有南歸涉江漫遊等稿松江詩鈔泰安有  
捨身崖越九禁之歲活無算會校秋闈以元卷改字被  
議歸居鄉留心地方公事如癸巳海警闔邑將罹不測  
以抗辨得釋毛奇齡西河詞話雲間諸進士嗣郢董孝  
廉俞諸君嘗於重陽後作神山之會時吳學士偉業在  
坐連覓女郎倩扶不得夜分滬上張宏軒刺史來赴挾  
一衣冠少年光豔暗射若薄雲籠月人各却步且不敢  
詢姓氏及移燭視之則倩扶也一座譁然蓋是時倩扶

已與宏軒定情久矣宏軒有詞紀事云云

金煜字子藏浙江會稽人順治十五年進士官鄞縣  
知縣曠園雜志煜一日有重瞳子其母弟馬玉超挾粵  
東一扶乩客來驚曰南唐李後主後身也後主見馬太  
后之詞而善之願爲之兒其遭逢不能遠過後主得乎  
戊失乎戊識之識之煜祖太常公笑曰彼知後主亦名  
煜故妄言耳後煜年十九中進士康熙庚戌罷官甲戌  
死攷後主於南唐建隆三年壬戌卽位至開寶七年甲  
戌而國亡身殞得失果皆同



戴京會初名子京字型遠浙江錢唐人順治六年進士  
歷官順天府府丞池北偶談型遠官山東提學清方孤  
峭人不可干以私所拔皆一時名士與施愚山先後齊  
名內陞大理寺丞予告久之起補稍遷順天府丞再予  
告歸幅巾野服參學徑山絕迹公府人品爲武林第一  
劉芳躅字鍾宛號增美順天易州人明戶部尙書餘裕  
子順治十二年進士歷官工部侍郎祀鄉賢畿輔通志  
芳躅出撫山東甫至卽飭屬吏屏絕餽遺廉訪民情利  
弊連上一十三疏凡所因革悉蒙 俞旨

張應瑞字受菴漢軍正白旗人順治十二年進士歷官  
兩淮鹽運使

張鴻猷字匡鼎順天通州人順治十八年進士歷官廣  
西提學僉事祀鄉賢畿輔通志粵西地介蠻服又經兵  
火後向學者寡鴻猷加意鼓舞文風丕變持操堅卓僚  
友俱不敢以私相干

曹首望字統六又字功貢直隸豐潤人拔貢生授內閣  
中書舍人歷官蘇州府知府祀鄉賢畿輔通志首望摧  
蕪湖關凡不利於商不便於民者悉除之擢儀曹郎出



知蘇州府蘇郡水陸交衝供億繁雜會赴浙閩兵過郡縣令弗能支撫臣輒以委之首望至則刻期辦事兵無騷擾境內安堵如故抵任焚香告天誓不取一錢終始無改節爲廉吏最

謝兆昌字瞻在浙江定海人康熙六年進士歷官河南道御史有閒居集兩浙輶軒錄兆昌於長蘆巡鹽時恤商剔弊前後章疏數十上以病乞歸

高恆豫直隸靜海人少保文端公爾儼子官生歷官河南鎮道天津府志 世祖諭公卿子入侍備顧問方面

之選少保高爾儼以姪恆豫失恃撫愛若己出恆懋體父志以恆豫應焉少保卒 朝廷恩廕一子恆懋復讓

恆豫

王日藻字印周號却非原名濂江蘇華亭人順治十二年進士歷官戶部尙書江南通志日藻由員外郎出爲河南提學僉事報最擢參議累遷江西布政使所莅有聲巡撫河南疏請開墾荒田四十四萬餘頃悉成沃壤分轄河務籌畫精密內遷刑部侍郎歷工戶二部賦役諸政裁斷穩愜以事落職復起總理高堰河工勤瘁卒



工所 特復原秩

桑開運字爾嵐直隸玉田人順治十二年進士歷官廣西布政司參議祀鄉賢有恤刑策畧日省撮要畿輔通志開運少有大志不屑細務以敦倫紀善風俗爲首平生拯人之危恤人之急親黨藉以婚葬者甚多時咸目爲長者

于璉山東文登人順治十五年進士

張英字敦復號夢敦安徽桐城人康熙六年進士歷官大學士贈太子太傅諡文端有存誠堂篤素堂詩文

集易書衷論江南通志英侍講幄敷陳經義民生吏治悉心獻納知無不言 聖祖初設 南書房俾每日侍直以資講論詞臣 賜第內城自此始及佐樞部掌邦禮恪慎清粹一時典章儀制 廟廷制誥之文多其手定登相位忠盡純誠佐佑啓沃歷任三十餘年未嘗一日離內直 聖祖稱其老成敬慎終始不渝有古大臣風 命工寫象以 賜生平多隱德外和內剛一私不染薦拔賢俊如不及從不使人知廣義田以贍宗族肅家範以率子弟一門咸勵名節温恭謙謹稱江左第一



年七十二卒於家 御祭卹葬逾恆制 世宗御極有  
甘盤舊學之思贈太子太傅崇祀京城賢良祠 賜祭  
於本籍 御書匾聯有忠純貽範師模如在之褒  
孫 焯浙江德清人

王尹方字鶴汀山西安邑人康熙十二年進士歷官內  
閣學士山西通志尹方雅度清望焜耀班行一時有四  
君子之目嘗夜 召至禁中講經書敷繹詳剴為講臣  
最主庚午江南鄉試 疏請破例搜落卷得 旨展期  
校閱率至丁夜事訖嘔血數升論者謂明西江姜公燕

主典江南試越六十年而復至庚午其甄拔耆俊適符  
之性至孝生母歿以嫡母年高具 疏請終養生母故  
不嫌於嫡母者也君子以為厚卒 賜祭葬

劉始恢字价人江蘇山陽人岑溪令昌言子康熙九年  
進士歷官吏部郎中江南通志始恢授大理評事時有  
兩議例有成獄讞法司而於情罪未協者輒奮筆駁正  
大理卿採其議列疏後附請得 報可歷吏部考功郎  
冢宰以廉慎薦轉文選郎中銓敘得宜時無滯才會河  
臣建束河注海之議始恢力持不可與詞臣喬萊合事



得寢

張鵬翮字運青號寬字四川遂寧人康熙九年進士歷官大學士贈少保謚文端祀賢良有忠武誌張邦伸錦里新編鵬翮九歲能文康熙己酉舉於鄉年十二入闈時監臨某夢綠衣白馬人入某號使吏記名於簿揭曉公名列焉明年成進士入翰林改刑部辦疑獄不避權貴再遷禮部郎中 上召見 賜太液鮮鯉 簡知蘇州府補兗州舉兵部督捕右理事與內大臣同使俄羅斯路經喀爾喀地之額諾德與喀爾喀為難聲言 王

師將援以敵額諾德執我前軍眾驚欲退公曰受天子命出使絕域奈何示小醜怯且吾退而彼襲其後將何以禦陳師固壘以張之而徐遣一介通其故若跋扈再計可也眾猶豫公厲聲曰某獨當之額諾德服罪扈從 南巡還至吳授浙撫七年士敦實行人息競爭會請免捐穀時議欲中傷奏上仍留任尋遷兵侍浙民繪像於竹閣淮黃泛溢南北阻絕議者欲改海運 上特調公經其事公博考輿圖徧尋故迹於河自開歸至雲梯以下於淮自洪河溯盱泗以上按審形勢歎曰河性



本直而壩曲之是拂其性也河流入海而隘其口是阻之流也昔之淮南高而北下今之淮西亢而東傾欲疏河必開海口欲出清必寒六壩乃陳十策以便宜行事報可於是遵王景塞館陶之法修潘季馴江一麟所築歸仁隄圻欄黃壩杜諸決口倍大河南北之隄曲者使直壩塘六壩開張福口裴家場瀾泥淺三以儲及張帥諸莊 上南巡迴視公曰卿之力也 召爲刑部尚書轉戶部遷吏部 上以公公直廉明有疑獄輒遣判之囑禮之參陳鵬年公直鵬年而曲禮公子懋齡牧懷

寧屬禮下公無所容回類此

吳一蜚字翼生號騰南江蘇長洲人康熙六年進士歷官吏部尚書蘇州府志一蜚少孤兄愉教之讀書成進士授山陰知縣內艱服闋補知洪雅縣時巡撫方行開墾增稅之令洪雅見徵七百九十四兩欲加至五千兩一蜚力爭之得減三千四百餘兩入爲工部主事擢御史降行人司副晉刑部尚書時有重案株連一蜚苦心消釋人多陰受其芘轉吏部卒於位貧無以殮朝士賻之始克訖事



夏州梁字孝齋又字斗巖江蘇鹽城人

于覺世字子仙號赤山別號鐵樵山人山東新城人順治十六年進士歷官廣東提學道候補按察使有居巢燕市使越嶺南諸集山東通志覺世授歸德推官以裁缺改知巢縣縣帶山濱湖號爲難治覺世爲政寬簡以嚴劑之俗好巫尙鬼捕其首奸俗乃改滇逆發難有巨寇起安廬間攻剽郡邑將據焦湖以應之揚帆自大江東下覺世設伏於南門伏橋身率甲士邀擊之殲其巨魁安廬之盜遂絕後以禮部郎中視學廣東教士先德

行而後文藝士翕然化之擢布政司參議致仕歸奉繼母甚謹鄉黨稱其孝焉山左詩鈔鐵樵合巢縣蝗不入境尤嫺武事嘗伏兵夜戰生擒巨盜後以終養不出唐豹巖太史稱桓臺二孝謂鐵樵及傅侍御彤臣也

魯 超字文遠號謙庵浙江會稽人順治十七年副貢生歷官右通政浙江通志超守松江有善政後爲惠潮道潮有絕戶虛丁久爲民累超除豁三十餘戶康熙甲戌水漲超晝夜替民築堤至今名魯公隄歲飢守令議發積貯平糶未敢擅動超力任之果 報可及晉粵藩



益勵清操葺珠江義學延宿儒以教士粵東兵餉例間  
用錢適錢滯兵苦虧折強市民物民復苦之超請全給  
白金兵民均便松江詩鈔謙庵任松江知府舉卓異者  
再巡撫湯文正薦廉能第一其在郡建扶風書院培植  
後進人尤仰其嘉惠多士焉

祖允圖字亮公奉天人官順天府府尹

王君詔

侯攷

張 鏊江蘇上海人泰安令錫懌弟官中書

臧眉錫字介祉號喟亭浙江長興人康熙六年進士歷

官御史戴璐吳興詩話喟亭由魯山知縣任中書改御  
史毛西河湖舫陪臧內史飲次采蓴云君方返承明西  
掖當朝參豈可蕩兩槩流連向空潭蓴羹末下豉本性  
我所諳

施天裔字泰瞻遼東人貢生官山東布政使

任 楓字木庵河南汝州人康熙六年進士官山西靈  
石知縣祀鄉賢有咽莊詩河南通志楓少值寇亂奉親  
避難寶豐城破賊逼令降大罵不屈賊怒刃其鼻耳罵  
益厲身被數刃妻王氏以身捍蔽迎刃不少避賊欲牽



之去王哭且詈賊怒刃其首而去楓復甦得不死  
李 迴字奉倩山東壽光人康熙三年進士歷官刑部  
侍郎山東通志迴沈靜簡默不邀名譽每以哀矜折獄  
讞出其手雖九死必獲一生人以行善稱之

郭 昌字介繁河南太原人順治十五年進士歷官戶  
科給事中

方大猷字歐餘號唵嚙浙江烏程人崇禎十年進士  
國朝歷官山東巡撫終運河道濟寧州志大猷晚年寓  
居濟上故人有為山海關總兵者大猷曾監其軍及其

人在黔以書招之不屈大猷久河上明於河渠富平居  
時猶上下二千載抵掌色飛潘檢討未贈詩極為推重  
善山水及書法求者全集揮灑不倦畫徵錄大猷官山  
東巡撫以事鐫級為河道山水學董間為倪黃多溼筆  
嘗畫河灘小景題曰十二載河干只記得者個工書善  
詩河南考城最多其蹟

張永茂奉天人舉人官江南督糧道布政司參議

鄭僑生江蘇邳州人康熙六年進士歷官湖廣提學道  
僉事



許承宣字力臣號筠庵自號麥青子江蘇江都人康熙十五年進士歷官工科給事中有宿影亭稿江南通志承宣授工科給事中首陳揚州水利賦役二疏與陝西鄉試還條上秦晉間利弊六事悉見嘉納弟承家官編修請假歸兄弟里居皆以循謹惠愛見稱

王 隲字相居號辰嶽又號幾菴山東福山人順治十二年進士歷官戶部尚書有養素堂詩集祀鄉賢山東通志隲升四川松威道時兵氛未靖轉餉深入險阻勦撫巴豬等寨恩威並濟邊徼永寧蜀中有採運楠木之

役適代藩司入 覲奏免之總督浙閩聞夏孽跳梁移鎮延平爲犄角以壯聲援

徐國相奉天人歷官安徽巡撫

魏學渠字子存號青城浙江嘉善人順治五年舉人歷官江西湖西道有青城山人集四川通志學渠任成都推官蜀中疲於差徭倡立章程又定嘉眉邛雅賦額公私稱便橋李詩繫學渠擢刑部主事贖魏女之沒官脫丁生之謗獄後補湖西道艱歸慷慨好施桐城錢澄之感其惠有詩曰還家擬建懷青閣從此飢驅不出門武



林汪繼昌以所憎築園江干名曰黃圃黃宗炎求買山之助出祇襪置其袖視之則黃金也

趙開雍字五紘號韋齋江蘇寶應人官知府有東魯嶺南粵西諸草

朱 綵山東單縣人

朱 紱字方來號澹居山東單縣人明大名道廷煥子歲貢生官蒲臺訓導有綠怡軒遺稿胡會思朱先生墓誌先生考忠烈公廷煥崇禎甲戌進士由繕部郎歷官大名兵備道甲申三月流賊自雍豫抵畿南獨忠烈公

以死自誓賊眾薄城下有奸人與賊通款城遂陷公猶督眾巷戰力屈被害時先生歸就試聞殞絕復甦者再四營葬畢隨詣幕府求得奸人殛諸市設位以奠順治乙酉伏 闕陳殉節狀得 旨與祭葬并錄事蹟編

史冊

沈廷文字原衡號元洲浙江秀水人康熙二十七年進士第一人及第官修撰有廣居文鈔燕邸雜錄北征南歸等集 熙朝新語廷文父於 大兵入粵時被執監禁廷文哭訴軍府得釋年已七十矣及廷文官修撰為



介壽徵詩同里陶越作引言有孝子身經百險幸覲止  
於鯨波鱷沫之餘孤臣跡越千鄉正徬徨於電閃沙驚  
之候之句都下盛傳

許聖朝字慎餘山東聊城人康熙十二年進士官吏部  
員外

顧見龍字雲臣江蘇吳江人畫徵錄雲臣以寫真祇候  
內廷名重京師余見所畫湯文正公像其子姪皆云酷  
肖然筆墨未見拔俗也

李 漁字笠翁浙江蘭谿人有一家言金華詩錄笠翁

少遊四方自白門移家杭州家居湖上碧波翠嵐環映  
几席喜其家與山水爲鄰自號湖上笠翁負才子名婦  
人孺子無不知者所作率胸臆構巧思不必盡準於古  
最著者詞曲其意中亦無所謂高則誠王實甫也芻及  
窗牖牀榻服飾器具飲食諸制度悉出新意故傾動一  
時靈芬館詩話笠翁以填詞擅名其他著作人多以俳  
優畜之然清詞麗句亦有不可沒者云云  
王士驥字隴西又字杜稱山東新城人康熙三年進士  
官內閣中書有聽雪堂詩集詞集遊大梁詩



顧芳菁 俟考

成德氏納喇字容若後更名性德奉天遼陽人康熙十二年進士官侍衛有合訂刪補大易集義粹言通志堂集 四庫全書總目德生華閱勤於學問鄉試出徐乾學之門遂受業焉九經解卽其所刻而徐乾學延顧湄校正之以書成於性德歿後板藏徐氏世遂稱徐氏九經解並通志而移之徐氏實相傳之誤也

史 夔字胄司江蘇漂陽人編修鶴齡子康熙二十一年進士歷官詹事江南通志夔在史館凡稽古禮文編

纂著作之事推爲巨手從 北巡著扈 蹕集典試兩

浙著樟亭集分理河工著觀濤集祭告南海著扶胥集 楊丕顯字耀祖

余國楨字端人號劬菴浙江遂安人明崇禎十三年進士官富順縣知縣有見聞記憶錄 四庫全書總目國楨自稱生平卷帙盡佚兵火偶舉所憶恂恍都如夢境後其子中恬分爲五卷日記文記人記物記異雜記大抵皆明末瑣事間涉荒誕無關考證又所作雜文並廁其中亦非得體



張惟赤字君帶號螺浮浙江海寧人順治十二年進士  
歷官工科給事中浙江通志惟赤居鄉捐造營房一百  
間使兵民分處歲飢捐米賑濟脩建學宮開濬海鹽運  
河邑人立碑記其事藤陰雜記螺浮有新園在棗林街  
合肥尙書過飲詩云柳市城闈百尺梧棗林街裏一囊  
書螺浮有十年霜雪老黃門之句一時名流爭和尙書  
觀螺浮侍史龍梭演劇有翩若驚鴻矯若龍之句

范璋山東滋陽人滋陽縣志范淑泰沈默有大志登進  
士授行人轉兵科都給諫輔臣王夢熊權傾內外莫敢

彈奏泰抗疏十二熊始罷士書風規峻整四字賜之丁  
艱旋里值辛巳之難人民相食自罄已財賑飢壬午殉  
國難贈太僕寺卿廕一子

紀 愈字孟起順天文安人康熙六年進士歷官工科  
給事中祀鄉賢畿輔通志愈夙具偉畧歲己酉土寇櫻  
城愈倡先守禦邑賴以安康熙十二年隨大將軍勦江  
西逆賊恢復撫州勸止殺戮全活甚衆或遺以所俘婦  
女貯之別室訪其夫還之仲弟昞以博學鴻詞應 召  
季弟元先中進士官淮安同知皆愈友愛訓勉之所致云



梁聯馨陝西平涼人康熙三年進士  
李彥瑁字華西陝西三原人康熙六年進士  
王穀振浙江會稽人康熙六年進士官同知鶴徵錄吳  
任臣字志伊浙江仁和廩生由內閣中書王穀振等薦  
舉授檢討

郭昂江蘇寶應人康熙九年進士官孟縣知縣  
孫在豐字屺瞻浙江德清人焯子康熙九年進士第二  
人及第歷官工部侍郎有尊道堂集浙江通志  
上閱視河工以高寶興鹽江泰等七州縣爲下河之衝民苦

昏墊 特簡廷臣發帑修治在豐身歷河淮交匯洪澤  
射陽車路場諸大河相度原委條奏數十事皆 報可  
乃鑿岡門潔白駒泝丁溪澗草堰嚴州縣妄派寒則具  
衣襦暑則備醫藥撫恤丁夫人心踊躍工亦次第畢舉  
鄧孝威尊道集序屺瞻嘗侍讌 清宮扈 蹕南苑極  
詩歌賡唱之勞所著尊道堂集情無不周詩亦具備而  
皆體宏格正流麗而沈雄縱宕而蘊蓄  
余雲祚廣東順德人康熙九年進士

顧二榮 侯考



張烈字武承號莊持順天大興人康熙九年進士官  
內閣中書十八年召試博學鴻詞改編修歷官贊善  
祀鄉賢有明史典訓讀易日鈔四書講義菽堂文集  
四庫全書總目烈篤守朱子之學故集中多講學之文  
然如朱陸異同論王學質疑皆未免鍛鍊周內不及賈  
董同異論之持平蓋漢學但有傳經之支派各守師說  
而已宋學既爭門戶則不得不百計以求勝亦勢之不  
得不然歟又讀易日鈔一以朱子本義爲因象設事就  
事陳理猶近時易說之不枝蔓者畿輔通志烈少聰穎

讀書數行俱下長而潛心性命之學毅然以閑邪衛道  
爲己任性至孝事繼母委曲承順人無間言生平著述  
皆有關人心世道之文

馮遵祖浙江歸安人康熙十二年進士官中書朱彝尊  
送馮遵祖宰平陸詩著書獨有五亭好作吏無如三晉  
閒醉裏襄陵官饗酒到來底柱郭門山耕餘讓畔田千  
頃唵對浮查水一灣白雁年年度汾曲相思煙月幾彎  
環

張爲煥江蘇崑山人康熙九年進士官渠縣知縣



白夢鼎字仲調號蝶庵江蘇江寧人康熙九年進士十八年薦舉博學鴻詞歷官大理寺評事有天山堂集江南通志夢鼎少與兄夢鼎勤學尙志時有二白之目鼎官評事總憲魏象樞以博學鴻詞薦庚申補行福建鄉試鼎爲考官得士最盛鶴徵錄蝶庵與兄夢鼎當明末俱以公論忤貴人陷於獄母陳氏怡然曰子爲范滂吾獨不能爲滂母乎會國變得釋

白夢鼎字孟新江蘇江寧人

白眉字子常評事夢鼎子

南懷仁字敦伯西洋人官欽天監監正加工部侍郎諡勤敏有坤輿圖說坤輿外紀四庫全書總目坤輿圖志與艾儒畧職方外紀互相出入而亦有詳畧異同大致不免有所粉飾池北偶談本朝監寺官加侍郎銜者絕少康熙以來欽天監管理歷法南懷仁加工部侍郎歿後贈禮部侍郎太醫院使馬三俊歿後亦贈禮部侍郎

京 俟考

均 俟考



國猶 俟考

阮 濬字季子安徽懷寧人居易錄季子築草堂於龍山冬夏惟披一衲因以自號性嗜酒工畫時攜襍被酒鑪畫具命一僮肩之遊散山水間遇勝處輒流連忘返謂其友劉鴻儀曰死即葬我草堂之側題曰酒人阮一衲之墓詩寒瘦畫筆清絕入 本朝乃卒亦高士云

口與洎 俟考

程 林字雲來安徽歙縣人周亮工印人傳林見寇氛日熾移家武林得免於黃流之難人服其有卓識精醫

時時講性命之學好為圖章又以意為花卉悉有生致

口祖謨 俟考

西塞山人案湖北大冶縣道士磯一名西塞山即元真子所謂西塞山前白鷺飛李太白所謂西塞當中路者余佮廬相國生長大冶故以此自號

質谷主人 俟考

孔毓圻字翊宸號蘭堂早至聖六十七代孫襲衍聖公加太子太保諡恭愨有蘭堂遺稿陳世倌恭愨公傳公八歲襲封詣京奏謝 太皇太后召見奉 特旨由中



道行錫予便蕃歷數十年大恩禮無間及大行入  
臨卒於京邸始終蒙恩最渥  
孔貞來字元起山東曲阜人明順德通判國朝歷官  
湖州府知府曲阜縣志貞來以陪祀授順德通判鼎革  
改判長沙籌餉賑飢具有條理薦擢真定府丞累遷湖  
州守未抵官遭耿逆之變遜跡武夷山中康親王知之  
資遣至京卒  
孔貞瑄字璧六號聊園山東曲阜人順治十八年會試  
副榜官大姚縣知縣有大成樂律聊園集滇記黔記縮

地歌 四庫全書總目貞瑄少遊江淮既而官泰安濟  
南繼乃遠宰大姚所歷山水頗多炎荒萬里徭俗苗境  
多所記載故軼聞逸事散見於集中其文則奇逸之氣  
往往不可控制而頽唐潦倒之處亦不一而足云孔繼  
汾闕里文獻考貞瑄究心經史授大姚知縣滇省鹽法  
壅滯前明定按丁派食之法兵火後丁亡額缺請減之  
民困以息黔國公勲莊被土酋所占上官受賂主之貞  
瑄力爭不得遂罷去  
孔貞燦號垣三又號西園季子山東曲阜人明給事中



聞詩子諸生官四氏學學錄有西園詩山東通志貞燦  
以孝友稱從子相繼爲世尹未嘗一至縣庭其狷介如  
此顏懋价曰給諫十一子先生獨有高致以千金致名  
工穿池築山極臨眺之勝宋牧仲爲方伯嘗先過之與  
定交焉

孔尙任字季重號東塘又號岸塘自稱云亭山人山東  
曲阜人監生授國子監博士歷官戶部員外有節序同  
風錄湖海集岸塘文集會心錄桃花扇小忽雷傳奇曲  
阜縣志康熙二十三年 聖祖幸魯尙任以監生同舉

人尙鉉充講書官尙任進講大學聖經尙鉉進講易經  
繫辭上曰孔尙任等陳書講說克副朕懷著不拘例議  
用又 命尙任尙鉉同衍聖公毓圻等導駕徧覽 先  
聖遺跡 迴鑾授尙任等國子監博士明年奉 命從  
刑部侍郎孫在豐疏濬黃河海口還 朝遷戶部主事  
升員外郎尙任博學有文名通音律諳祖庭典故嘗患  
舊誌未備廣搜博采別撰新志二十四卷居易錄東塘  
博雅好古丙寅丁卯間在江都得漢銅尺一上有文曰  
慮虜銅尺建初六年八月十五日造後又得一尺定爲



司馬文正公布帛尺自作漢銅尺記周尺考周尺辨三篇極精核山左詩鈔先生以博士奉使維揚駐節三年傾貲結納名流畢集以漢銅尺較宋布帛尺確然得周天之準千古之疑一朝頓釋有功於禮樂匪淺嘗作闕里誌修族譜既成以名其二子其風致可想見云

孔尙鉉字立之山東曲阜人康熙十一年舉人歷官戶部主事

孔允陞字超宗山東曲阜人官壽光教諭

道

孔興詔字綸錫山東曲阜人官雲南糧儲道有滇遊集  
孔衍鈺字泗寰山東曲阜人官太常寺博士曲阜縣志  
衍鈺弱冠遭賊兵轄汶城害其祖母及父兄慟欲赴鬪  
死念母暨諸弟幼潛與避亂伺寇退厚葬三親毀甚長  
授大常博士奉祀虔潔年五十事母若孺子慕母病親  
奉湯藥夜不解帶撫弟姪恩誼兼至

孔興誘字起正山東曲阜人官卽墨訓導

顏鼎受字孝嘉自號初陽子浙江桐鄉人諸生有嶧山



堂半樂堂詩漁歌曲構李詩繫鼎受少以孝聞九歲得  
句云輕風搖翠竹微雨滴黃花遊楚遭亂避跡爲黃冠  
盛百二漁鼓曲跋山人少從念臺劉公遊又與楊園張  
子相切劘有通符篆避兵祈陽山中忽患虎暴山人以  
小木書丹篆置通衢明日獵者於其下獲二虎一豹山  
中以安

顏堯揆字紫崖又字耐齋福建永春人明岷府右長史  
延榘孫官無爲州知州江南通志堯揆知無爲時前令  
佟國貞所築新壩漸爲江濤所齧揆自李家祠至王家

壩築壩八百八十丈濶三丈高一丈次年大水田廬恃  
以無恙并和州含巢二縣皆賴焉州民勒石於壩上名  
之曰顏公壩

顏敏字澹叟順天宛平人順治六年進士歷官廣西  
布政使鈕琇觚賸顏方伯裁缺家居久不得調康熙十  
六年江南藩司缺出客有以經營之說進者顏曰吾向  
在西秦元旦假寐夢乘官舫舫中白榜青書有月臨波  
作案雲倚樹爲屏之聯出觀兩岸紳士稠雜皆云迎方  
伯公者行已至廣西界矣十年前曾有此兆他非所望



閱三載顏以舊例引見 欽點粵西竟破於任

顏 敷字敷五順天宛平人順治五年舉人歷官敘州府知府祀名宦四川通志敷守敘州府時滇寇犯境戎馬在郊捍禦多方民賴以安後卒於官郡人思之不已

顏光南字衡山江蘇儀徵人

顏光表字斗涵浙江仁和人

顏伯璟字子瑩山東曲阜人官河間知府贈光祿寺卿允紹子明諸生朱彝尊顏公墓表河間兵至中憲公城孤乏援集家人一室自焚公暨弟伯玠時家兗州府兵

亦至公肥不能駛足伯玠掖以行公給弟他顧自躍城下伯玠俯視慟哭矢及身而卒公伏地爲邏卒所得昇告其帥帥驚延之坐留帳前有被掠者語曰一婦人不肯行卒反及擊其臂折罵不已殺之牆下已四日矣駢其息未絕載之還卽朱宜人中憲公之自焚也幼子伯珣甫六歲其僕呂有年抱之出途中流矢死伯珣匿民間得免公旣拾父遺骸訪得與俱還同居無間

顏伯珣字石珍一字季玉號相叔伯璟季弟恩貢生歷官壽州同知有祇芳園集舊雨草堂集孔貞瑄日相叔



早年遊金陵爲詩風流跌宕晚年臻平淡靜深之境如  
數十年面壁老僧令人驕矜之氣不滌自消山左詩鈔  
先生官壽州日修復芍陂之利余署鳳陽府篆聞其遺  
愛在泗上築祇芳園聚一時名流唱和其中

顏伯秀字方壺山東曲阜人歲貢生官樂陵訓導

顏光是字去非山東曲阜人康熙二年舉人歷官邵武  
府知府曲阜縣志光是授新野令邑故歲貢鉛郡縣吏  
因緣爲奸光是痛加滌除郡守怒不爲動上官以爲能  
擢戶部主事轉兵部郎中出爲邵武守以忠信率屬獄

至立剖無留者時有豪民犯大辟屬私人以金贓等光  
是日卽巨萬吾判可易乎其執法如此顏氏族譜光是  
引疾歸不樂居城市從仲兄與鄉之父老遊出則同車  
連騎入則聯牀共几陶陶于于者十餘年痛伯兄早逝  
以次子爲之嗣更給田百畝戒之曰謹奉祀以代養也  
每與仲兄議建家祠未幾兄卒瞿然曰吾年七十餘一  
且溘然長逝誰爲此者遂買地庀材夙夜經營落成日  
率三世子孫祭畢曰可報仲兄於九原矣

顏光猷字秩宗號澹園伯璟長子康熙十二年進士歷



官河東運使有易經說義水明樓詩曲阜縣志光猷選  
庶吉士充丙辰會試同考官父憂服除改行人司正轉  
刑部郎中出守安順府值提督李芳述部兵激譟光猷  
匹馬入其壘曉以大義皆投戈受命芳述曰公再生我  
也轉河東運使時山陝河南行引鹽引尾州縣關防境  
壤相錯跬步罹法光猷力請通省爲一關防民以永利  
祿俸所積修復聖廟繕以石欄建陋巷坊置祀田四  
百六十畝請以祖允紹從祀事母色養老彌篤與人質  
直見人必勸以善隨所得淺深皆得其報

顏光敏

顏光敏字學山伯璟季子康熙二十七年進士官檢討  
曲阜縣志光敏康熙甲子舉於鄉其冬天子幸闕里  
奠至聖光敏以助祭例卽宰縣不就越三年成進士  
授檢討講官闕聖祖憶光敏名召問其家世及幸  
魯時事喜甚遂補日講官起居注主浙江鄉試已遂提  
督浙江學政直隸江浙例差閣部大臣光敏以檢討承  
特簡異數也光敏益感激絕請謁嚴校勘東芻粒米  
不以累有司積勞嘔血不少懈訓士如嚴師慈父士氣



騰踊所刊試牘爲八宗師考卷之冠在官三年雖舉主  
不少徇大逆諸貴人意往往爲蜚語欲中傷文吏吹索  
不得毫毛以簿書疵鑄二級光敦夷然不介蒞巡撫線  
一信來祖送直入臥室文籍外無長物太息而去抵北  
新關權使假拜謁入舟見數敝篋無扁鐫乃錯愕愧謝  
及復 命遂引疾 上嘉其廉慎 特命大學士王熙視  
疾傳 旨慰留疾篤乃得歸卒於家年僅四十光敦有  
神悟少學鼓琴崇朝盡得其妙習射不中不歸食至日  
昃發必中用心甚危苦至傷生所撰著皆未成士人情

之浙江通志光敦督學浙江往例提調官薦儒童一二  
人無敢以私干者杭郡代倩特甚取歲進新生扃戶另  
試與原卷迥異者黜之並黜代倩保結之人所刻試牘  
風行海內垂三十餘年士林誦習不異於初旣祀名宦  
浙士復念之不已專祀西湖春秋致祭朱彝尊顏君清  
德碑浙東西就試者至萬餘人主司之不公士且攢譏  
竦誚有裂胸紙而以瓦礫擊其後者君來榜旣放雖見  
抑者無怨及聞君再至各以手加額君克循祖父忠孝  
之門風入稟太天人之訓焚膏點筆靡間晨暮席門甕



牖韋帶紉履之士悉甄綜無遺才飯藜茹藿甘之如飴  
士皆鼓舞自奮而君斯瘁矣

顏肇雍初名肇維字肅之又字次雷號漫翁自號紅亭  
老人光敏子貢生歷官行人有鍾水堂詩莎齋稿漫翁  
編年稿牛運震顏公墓志公所與遊如嶧陽李克敬歷  
敬王萃等皆當時名士其掌臨海龍顧山陽書院造就  
尤多詩長於近體曲阜縣志肇維知臨海以興利革弊  
爲任首除里甲濶稅徵米改折之累民情歡服值江海  
鬪泛濫爲災設粥賑飢者全活無算察趙公河故道三

溝六浦悉鳩工浚之灌溉有資建太平橋增高湯信國  
備倭五十九城之七

顏懋僑字癡仲一字幼客肇維子恩貢生官觀城教諭  
有江干幼客石鏡齋蕉園諸集西華行卷天文管窺撫  
史奈園錄秋莊小識霞城筆記曲阜縣志懋僑幼博學  
強記隨臨海任台守張招飲半江樓酒酣出紙筆索爲  
天台賦援筆立就充 萬善殿教習寶齋齋二十三王  
謂日久聞詩人顏幼客今乃得見耶 召試瀛臺天陰  
欲雪 上得句云雪香梅綻蕊卽對云雲響竹留聲又



賦望雲思雪紀 恩詩和 御製落葉詩悉稱 旨授  
教諭嚴祀事簿正頒肉之格理學地及膳士田之侵於  
民者還其舊顏懋价幼客行狀兄生有異徵泗水楚家  
寺僧慧朗將化與弟子訣云投舍曲阜顏考功宅詰朝  
來訪具言其事於是人以爲慧朗後身鞠遜行云關中  
屈服稱詩都下高自位置後進者罕得一見幼客矚其  
在寓排闥入臥內竟登其榻與對坐久之屈不能耐詢  
所自曰我曲阜顏懋僑也聞君能詩未知如何特來訪  
君一談屈已心異之往復旣久辨若縣河屈大折服因

謝過遂訂交焉

顏懋倫字樂清號清谷運使光猷孫拔貢生歷官鹿邑  
知縣乾隆元年薦舉博學鴻詞有癸乙編端虛吟什一  
編夷門遊草曲阜縣志懋倫擢鹿邑令五年移疾歸後  
發河南候補補滑縣蝗甚勤能署裕州泌陽南陽皆有  
聲篤好文學與滋陽牛運震晉江何琦相切劘尤邃於  
詩林韓文公詩林補遺初谷表歸與歐皆非懋倫  
顏懋价字介子號慕如自稱五梧居士懋倫弟拔貢生  
官肥城教諭曲阜縣志懋价少與懋倫博稽禮經定詳



喪制凡飭匱井椁治墓及牆柳帷荒明器下帷之屬悉  
遵古禮故其執親之喪必誠必信勿有悔書宗顏柳詩  
希杜韓有文名授教諭痛時俗葬親慢與渴皆非豐古  
且糜費作正俗說新 文廟修禮樂器遴佾生習儀容  
釐正學田葺先賢祠以敦本厲品期有用學諄諄課士

顏氏尺牘姓氏考 終



